

Poldi Kolinhidok pepa timen̄ youyemguk

Yodakale Mede

Pepa yoŋ adi Poldi Kolinhi dok mede timen̄ youyemguk. Kolin kayoŋbop adi Pol negoŋ Wapumn̄k Jesu Kilisto'walaŋ Mede Momooŋ yohautataugukneŋ tubumintaguk. Kolin adi Lomahi'walaŋ kwet wapumneŋ Akaia kwet diniŋ yokwet mebi ituguk. Yokwet uyadi ime luhi gagayeŋ ituguk doktiŋa muwage wapuhi fedi muneeŋ bomboŋ kibikibi tinene helemahelamaŋ uŋambuŋat tagiŋ. Unduŋ tiŋa metam niŋkadehi fe yanagila buŋa boiune muneeŋ bomboŋ fee hinek tubumintagiŋ. Unduŋ tiŋa titiŋ hogohi fee moŋgola buŋa bopneŋ takaliŋa tigiŋ. Uyadi bepaŋ yalayaŋahik moŋgola buŋa muni heyemiŋa yeniutumbagiŋ. Unduŋ tiŋa tiŋgiyoŋgiyone tiŋa kefiŋe kisaŋ tigiŋ.

Titin̄ be hatihati undiniŋ hakuk kaŋ Jesu'walaŋ kayoŋbop nolidi titiŋ u maan̄ tigiŋ doktiŋa Jesu'walaŋ kayoŋbop nadisukilitihiniŋ uŋoŋ hatigiŋdi Poldok pepa youlimiŋa ninadigiŋ. Kaŋ Poldibo Jesu welehiŋki fuliŋgoŋ nadisukilitimiŋa adi'walaŋ kayoŋbop dediŋ hatibune tuwot tibek wondok mede youyemguk. Tiŋa yokwet uŋoŋ kefiŋe kisaŋ hakuk doktiŋa metam nadisukilitihiniŋdi hekimalam tiŋa molom molom didimeniŋgoŋ kiulihi tiŋa hatidok yeniŋkilitiguk.

Agon̄ fiye 13 gineŋ adi Bepaŋdi metamniye welen̄di hinek yabukahilelak wondok mede fafaŋeniŋ youyemguk. Kaŋ mede wondi Bepaŋ'walaŋ Mede Momooŋ pepa yendiniŋ maaneŋ youkiŋ wondiniŋ daŋiniŋ hatak. Tiŋa metam kobu hatiyam indi maan̄goŋ ninindidimelak.

Pepa yendiniŋ yohebet

Fiye 1-4 Kayoŋbop ulitawaŋ bop molommolom hatitagiŋ

Fiye 5-6 Hatihati eŋ titiŋhik tuwot mu tuguk

Fiye 7-10 Kayoŋbopdi kwetfoloŋ dediŋ hinek hatibune tuwot tibek

Fiye 11-14 Bepaŋ gikiŋgoŋ timiŋa niutumbadok mede

Fiye 15 Kumun̄ gineniŋ kaikaŋ pilapilat diniŋ mede

Fiye 16 Mede yodapman̄

Yokahanj mede

1 ¹Nu Pol Bepanj'walañ nadihebet tagimneeñ Jesu Kilisto diniñ Aposel tugut. Nu tiña notnik Sositeni indi ²Kolinhi Bepanj'walañ kayoñbop hiditok pepa i kamehamamut. Hidi Wapum Jesu Kilistodi hehitubu-walandaañ ungoñiñ hatidok haniñguk. Adi'walañ metam iñoñ be niñkade hatiñ hogohogok, hidi wanañ unduñ tihambune Wapum Jesu Kilisto wou niutumbaañ ninadiñ hidi mebop adigut kubugoñ tigiñ. Unduñ tinene Wapumdi kubugoñnik tilak.

³Betnik Bepanj be Wapum Jesu Kilisto adi'walaaniñ siloñ tobogoñ be kulema u hidut hatuwaak.

Poldi Bepanj niutumbaguk

⁴Bepanj adi Jesu Kilistodok tiña siloñ tobogoñ tihamguk wendok nadisuñ hati-niutumbalat. ⁵Adi Bepanj'walañ Mede Momooñ yohautadok nadisu eñ nadinadi mebimebi kisañ hamguk. ⁶U Kilisto diniñ yohauta mededi hidi'walañkade foloñ hakuk doktiña unduñ tuguk. ⁷Unduñ doktiña Munabulidi kwanai hogohogok wendok tuwolit siloñ tihambune hidi nemek niñdok baniñ mu tiñ. Wapumnik Jesu Kilistodi mingoñ mintaune kakañdok hogok woom hatiñ. ⁸Adigoñ Wapumnik Jesu Kilisto diniñ busuwabusuwanñ nai foloñ yomnit mokit yayatdok hehikasopneeñ hehitubu-kilitiu hatilune nai hik dapmawaak. ⁹Bepanjdi mihiniñ Jesu Kilisto Wapumnik kuyoñ, adut tomboyoutdok haniñgukdi undumbo yoñ, undumbo yoñ mu tilak.

Kolinhi adi kayoñbop gineñ ulitawaulitawa tigiñ

¹⁰Notneye, nu Wapumnik Jesu Kilisto diniñ wou doktiña munte mede i yobe nadiñeñ: Hidi tosiwe tiña mede mebimebi yoyo be kikakwihita mu tiyaneñ. Hidi adi nadinadi hik gineñ welekubugoñ tihatiyaneñ. ¹¹Notneye, nu kahat i nadiña mede u yolat. Lekiñgoñhik foloñ mede mintaguk hatak u Kolowi hekidi yobu nadigut. ¹²Mede indiñdok yolat. Hidi'walahidi mede indiñ yoñ "Indi Pol diniñ mebop", eñ nolidi indiñ yoñ "Indi Apolo diniñ mebop", eñ nolidi indiñ yoñ "Indi Pita diniñ mebop", eñ nolidi indiñ yoñ "Indi Kilisto diniñ mebop".

¹³Kei! u dediñ. Kilisto adi daneñ fee be tuguk? Be Pol nu hiditok tiña koloñdabek foloñ be kumuñgut? Be Pol nu'walañ wotnene foloñ Imeyout be tigiñ? ¹⁴Yopo hinek, nu Imeyout mu tihamgut. Nu hidi'walaaniñ lekiñgoñhik foloñ meyat lufom hogok Imeyout tiyemgut adi Kilispas dut Gaiyus. ¹⁵Unduñ doktiña hidi'walaaniñ nebek niñdi nu wotnene foloñ Imeyout tugumun tuwot mu yobek. ¹⁶Nu biyagoñ metam noli nimaañ yoñyoñmeñgut adi Stefana menjemenjiye. Eñ nebek noli nimaañgoñ neñbe yoñyoñmeñgut bek u mu nadilat. ¹⁷Nu Kilistodi metam Imeyout tiyemdok mu napmeune bugut. Adi Mede Momooñ yenyehitubu-didime titiñdok hogok

naniŋkulune bugut. Tiŋa Kilisto'walaŋ kolonḍabek diniŋ mede fofonŋnit tibaakneŋ yoŋa me diniŋ nadisu-fuliŋgoŋ mede u mu ulihiŋa yolat.

**Bepaŋ'walaŋ nadisu-fuliŋgoŋ wendi me'walaŋ
nadinadi ulatifoŋ kalakapmelak**

¹⁸Metam kadaka tiŋa hamdok gigit tiŋ adi kolonḍabek diniŋ mede u nadiune foloŋnit mokit tilak. Ingoŋ Bepaŋdi nihitubu-lodaune hatihati fafaŋeniŋ kahileyam indi yadi mede u nadiyam kaŋ Bepaŋ'walaŋ saŋiniŋŋiŋ tilak. ¹⁹Youkudip Mede niŋ indiiŋ hatak:

“Nu me diniŋ nadisu-fuliŋ diniŋ mede u ulene fowaak. Tiŋa nu nadinadihinit'walaŋ nadinadihik tubuhaŋindayembaat.”

²⁰Kaŋ me nadisu-fuliŋhinit adi de? Be naditawa me heki de? Be nai indidegoŋ mebi nadidakale me hatiŋ heki de? Bepaŋdi kwetfolog me heki'walaŋ nadinadihik tubuhaŋindaune foloŋnit mokit tilak.

²¹Kaŋ Bepaŋ'walaŋ nadisu-fuliŋgoŋ diniŋ nadihebet mintakabeleune medi nehi'walaŋ nadinadi gineŋ Bepaŋ'walaŋ mebi nadinim yo tigiŋ iŋgoŋ tuwot moŋ. Unduŋ doktiŋa Bepaŋdi metam ninigitdok talik niŋ tubumintaguk adi indiiŋ: Indi Mede Momoŋ yohautanene metamdi nadiune tuwot mu tubune mede kaulerŋ yogiŋ. Ingoŋ Bepaŋdi nadiune tuwot tubune nediyerŋdi mede u nadiŋa nadisukilitiiŋ adi hogok yanagitak.

²²Judahi adi kunumneniŋ kudi kakaŋdok gigne tiŋ. Eŋ Gilikhi adi me nadisu-fuliŋgoŋhinit mintadok gigne tiŋ. ²³Kaŋ indi adi Kilisto kolonḍabek foloŋ ukiŋ wendok mede yone Juda me heki'walaŋ talik tuŋgumba tilak. Eŋ me Judahi'walaŋ feknit mokit adi yadi nadiune mede kaulerŋ tilak. ²⁴Unduŋ tulune Bepaŋdi yeniyehimaneguk, Juda me be Gilik me, adi Kilistodok indiiŋ nadiiŋ, “Adi Bepaŋ'walaŋ saŋiniŋ, tiŋa Bepaŋ'walaŋ nadisu-fuliŋgoŋ.” ²⁵Me adi Bepaŋdi kwanai tuguk u nadiŋa mede kaulerŋ yolune adi'walaŋ mede kaulerŋdi me'walaŋ nadisu ulatifoŋ kalakapmelak, be Bepaŋdi kwanai tuguk wendok gweheyerŋ yolune adi'walaŋ gweheyedi me'walaŋ saŋiniŋ ulatifoŋ kalakapmelak.

Kilisto adi Bepaŋ'walaŋ nadisu-fuliŋ diniŋ tinaulibinik

²⁶Notneye, hidi me dedihigoŋ hatilune Bepaŋdi hanihehimaneguk u nadikanerŋ: Hidi lekiŋgoŋhik foloŋ me kwetfolog diniŋ nadisu-fuliŋgoŋhinit fee moŋ, eŋ saŋiniŋhinit fee moŋ, me wohiyehinit maŋ, fee moŋ. ²⁷Me dauyerŋ kaulehi hatiŋ adi Bepaŋdi yeniyehimaneerŋ me nadisu-fuliŋgoŋhinit yehitubu-mekalak. Be me dauyerŋ gweheye bilakenehi hatiŋ adi Bepaŋdi yeniyehimaneerŋ me saŋiniŋhinit yehitubu-mekalak. ²⁸Tiŋa me dauyerŋ hogohi fofonŋhinit hatiŋ adi Bepaŋdi yeniyehimanelak eŋ me dauyerŋ kondiŋahi hatiŋ adi Bepaŋdi yeniyehimaneerŋ me wohiye loloŋhinit adi'walaŋ kasop diliteleyemilak.

²⁹Kwetfoloŋme niŋdi Bepaŋ heberŋ foloŋ sigitiŋalo mede yobaakneŋ yoŋa unduŋ tuguk. ³⁰Adi ne Jesu Kilisto wou foloŋ hatihati unŋoniŋ hamulak. Kilisto adi Bepaŋ'walaŋ nadisu-fuliŋ diniŋ tinaulibinik. Adi yom moŋgokutnimilak, be welehakale tubumintanimilak, eŋ kadakaniniŋ diniŋ folofolok sidokonimuguk. ³¹Ale Youkudip Mede indiniŋ hatak u fafaŋeguk. Nebek niŋdi youtumba mede yobe kaŋ Wapum'walaŋkade hogok yobaak.

Poldi Bepaŋ'walaŋ mede hogok nadisukilitidok yenindidimeguk

2 ¹Notneye, nu Bepaŋ'walaŋ yodakale mede hanimbene woŋ hidut hatigut nai unŋaniŋ nadisu-fuliŋgoŋ mede eŋ hanihohoket mu tugut. ²Be mede noli yodok nemu tiulidokoŋ ugut. Nu adi hidut hatiŋa Jesu Kilisto koloŋdabek foloŋ uliŋit adi'walaŋ mede hogok haniŋdok nadifafaŋeŋ ugut. ³Nu hidut hatiŋila gweheyenŋoŋ, eŋ muntamuntayenŋoŋ, tiŋa hehelenŋoŋ hatigut. ⁴Nadisu-fuliŋgoŋ mede be mede yogaligalike mu tiŋa Mede Momooŋ yohautagut. Nu adi hidi Bepaŋ'walaŋ saŋiniŋ u kaŋ nadisukilitineŋ yoŋa adi'walaŋ Munabuli diniŋ saŋiniŋ foloŋ yohautagut. ⁵Tiyauge hidi meeniŋ'walaŋ nadisu-fuliŋgoŋ mede foloŋ nadisukilitineeneŋ doktiŋa unduŋ tugut.

Poldi Bepaŋ'walaŋ nadihebet yobihikuk

⁶Bepaŋ'walaŋ nadisu-fuliŋgoŋ diniŋ mede adi me Bepaŋ'walaŋ talii fafaŋeŋ takalitaueŋ mehinek tiŋiŋ adi heki adi kedem yeniyam. Tiŋa undugoŋ kwetfoloŋ me'walaŋ nadisu-fuliŋgoŋ diniŋ mede be me talitimeŋ kwetfoloŋ iŋoŋ liweneenŋi mede yoŋiŋ, indi wendok tuwot mu yoyam. Mokoŋ. ⁷Indi adi Bepaŋ'walaŋ mede fuliŋ eŋ hebiniiŋ u yohautayam. Mede woŋ adi me indi minta walandaanŋ adi'walaŋ hauta gineŋ hatidok Bepaŋdi koomkwaha nehogok nainit mokit tububihila hatiŋila yoyout tuguk. ⁸Me loloŋhinit hatigiŋ adi'walaaniŋ nebek niŋdi mede hebiniiŋ u mu nadidakalegiŋ. Nadidakalene tigiŋ binek adi hauta Molom koloŋdabek foloŋ tuwot mu utne tigiŋ. ⁹Wendok Youkudip Mede niŋ indiniŋ hatak,

“Bepaŋdi me welesiloŋ timiiŋ hekidok nemek momooŋ tiulidokoguk u nebek niŋ dawidi nemu kaguk be magidi nemu nadiguk be me nadisuŋiŋ gineŋ nemu nadisuguk.”

Unŋoniŋ Munabulidi Bepaŋ'walaŋ Mebi ninimbihitak

¹⁰Mede unduŋ u biyagoŋ hatak iŋgoŋ oŋ, indi yadi Bepaŋ'walaŋ Unŋoniŋ Munabuliniŋ niŋkulune mede u ninimbihikuk. Unŋoniŋ Munabuli wendi nemenemek hogohogok wendiniŋ mebi fuliŋgoŋ hinek nadilak. Eŋ Bepaŋ ne'walaŋ mebi fuliŋmamaŋ hinek hatak u wanaŋ

nadilak. ¹¹Me nediyeŋ noliŋiŋ'walaŋ weleniŋ diniŋ mebi nadiwek? Me weleniŋ molom nehogok nadilak. Unduŋoŋ hinek nebek niŋdi Bepaŋ'walaŋ weleniŋ diniŋ mebi u tuwot mu nadiwek. Ne'walaŋ Uŋgoniŋ Munabulidi hogok nadilak. ¹²Kaŋ indi kwetfoloŋ me diniŋ munabuli mu moŋgokumun. Indi adi Bepaŋ'walaŋ welesiloŋ diniŋ mebi nadidok tiŋa Bepaŋ'walaaniŋ Munabuli u moŋgokumun. ¹³Indi Bepaŋ'walaŋ Mede Momoŋ wendegoŋ mede kahat tihamam. Woŋ adi me nadisu-fuliŋgoŋhinitiŋ mu nininihitubu-didimegiŋ, woŋ adi Uŋgoniŋ Munabulidi nininihitubu-didimeguk. Unduŋ doktiŋa Uŋgoniŋ Munabuli diniŋ mede adi Uŋgoniŋ Munabuli'walaŋ maŋiŋ mede tagimneeŋ yoyam. ¹⁴Me Uŋgoniŋ Munabulihiniŋ mokitiŋ Bepaŋ'walaŋ Uŋgoniŋ Munabuli diniŋ mede u tuwot mu nadineŋ. Adi u dediŋ tiŋa nadineŋ? Moŋ hinek. Adi u nadiune mede kaulen tibeŋ. Woŋ adi me Uŋgoniŋ Munabulihiniŋ hogok nadidok tilak. ¹⁵Me Uŋgoniŋ Munabuli fotokoyembune hatiŋdi nemek hogohogok u kedem nadidakaleneŋ. Iŋgoŋ me Uŋgoniŋ Munabulihiniŋ mokitiŋ wendok mebi mu nadidakaleneŋ. ¹⁶Wendok Youkudip Mededi indiiŋ yolak,

“Wapum'walaŋ nadinadi u nediyeŋdi nadilak ale kedem nindidimewek?”

U biyagoŋ, iŋgoŋ Munabulidi nihitubu-lodaune Kilisto'walaŋ nadinadi kedem nadidakale-hinakayam.

Kolinhi adi nadisukilitihik wapmihidok tuwolit tuguk

3 ¹Notneye, nu koom hidut hatiŋila me Uŋgoniŋ Munabulihiniŋdok mede yenilat wendok tuwolit mu hanilugut. Mokoŋ. Nai uŋaniŋ adi me titiŋ komi kelej hatiŋdok mede yenilat wendok tuwolit hanilugut. Maŋgoŋde, nai uŋaniŋ hidi nadisukiliti agaŋ tigiŋ iŋgoŋ Kilisto'walaŋ talii kelej hatihati adi wapmihidok tuwolit hatigiŋ, doktiŋa unduŋ tugut. ²Nu nanaje fafaŋehi mu hamuŋgut, nom hogok hamtoigut, maŋgande nanaje fafaŋeniŋ hambene deti nane tigiŋ. Tiŋa unduŋoŋ nai indidegoŋ maŋ nanaje fafaŋeniŋ nanaŋdok tuwot mu tiŋ. ³Maŋgoŋde, hidi nai indidegoŋ kinadiwolika eŋ tosiwe hati-tiiŋ doktiŋa titiŋ komi kougoŋ keleiŋ nadihamulat. Hidi kwetfoloŋ me Bepaŋ'walaŋ mede mu nadiŋa hatiŋ nabugoŋ tiŋ. ⁴Me niŋdi “Nu Pol diniŋ me,” yolak kaŋ me niŋdi “Nu Apolo diniŋ me,” yolak. Hidi unduŋ hati-yoiŋ doktiŋa me undihi hidi yadi kwetfoloŋdok gigit hinek hanindok.

Kahaŋ tubune folooŋ mintalak aditok hogok yodok

⁵Apolo u nedigoŋ? Kaŋ Pol nu nedigoŋ? Indi tipilapilaye-me hogokdi Mede Momoŋ hanindene nadisukilitigiŋ. Tiŋa unduŋoŋ Wapumdi kwanai ninindakaleguk wondok tuwot hogok tugumut. ⁶Nu diniyeti tugut, eŋ Apolodi kila takatiŋa ime giyout tuguk. Kaŋ Wapum ne

kahaŋneune folooŋ mintaguk. ⁷Ale diniyeti tilak aditok mu yodok, eŋ kila takatiŋa ime giyouŋ tilak aditok mu yodok. Kahaŋ tubune folooŋ mintalak Bepaŋ netok hogok yodok. ⁸Diniyeti tilak eŋ kila takatiŋa ime giyouŋ tilak adi'walaŋ tuwolithik adi kubugoŋ, eŋ tuwahik adi kwanaihikdok tuwolit molomolom moŋgotemeek. ⁹Indi Bepaŋ'walaŋ tipilapilaye, hidi adi Bepaŋ'walaŋ dinina eŋ Bepaŋ'walaŋ yot.

Kudupdi kwanai diniŋ mebi tubudakalewaak

Tiŋa undugoŋ hidi adi Bepaŋ ne'walaŋ yoli kougoŋ malak. ¹⁰Bepaŋdi siloŋ tobogoŋ tinamuŋa kwanai namuŋguk wondok tuwot nu yot mamaŋ diniŋ mebi nadihinakalatdi kawade kainiŋ habeyeŋ simen galigut.^a Jesu Kilisto uŋakoŋ. Nebek niŋdi u bikabuŋa gitipmuŋ niŋ tububihitdok tuwot mu tilak. Ala nebek niŋdi wendok foloŋ tomboyoula yot mahatilak adi nadinadiŋale maluwaak. ¹¹Simen kainiŋ galiŋit hatak Jesu Kilisto uŋakoŋ. Nebek niŋdi u bikabuŋa gitipmuŋ niŋ tububihitdok tuwot mu tilak. ¹²Ale nebek niŋdi yot simen kainiŋ galiŋit hatak wendok foloŋ gol, silwa be kawade fafaŋeŋdi, be bem muŋgene, eŋ bahaŋgit, eŋ gubohok hapmuŋdi tomboyoula mawaak adi hatigene kougoŋ yot mamaŋniŋ kwanai diniŋ mebi dakalewaak. ¹³Hatigene nai wapum foloŋ-ku dakalewaak. Uŋaniŋ kudup wapum daŋewaak. Kaŋ kudup wendigoŋ kwanaihik diniŋ mebi tubudakalewaak. ¹⁴Nai uŋaniŋ kwanai-me nediyeŋdi yoli simen kainiŋ galiŋit foloŋ youdihina mawaak adi kudupdi daaŋ moŋ kaŋ biune tuwaŋiŋ moŋgolaak. ¹⁵Eŋ kwanai-me niŋ'walaŋ yoli kudupdi dadapmawaak kaŋ ne adi Bepaŋdi kedem tubulodawaak iŋgoŋ tuwaŋiŋ mokit kudup gineniŋ nagiliŋit unduŋ tibaak.

Indi yadi Bepaŋ'walaŋ yoli uŋgoniŋ

¹⁶Hidi yadi Bepaŋ'walaŋ yoli uŋgoniŋ, kaŋ Bepaŋ'walaŋ Munabulidi welehek gineŋ ipilat tilak, u hidi mu nadiiŋ be? ¹⁷Me nediyeŋ Bepaŋ'walaŋ yoli uŋgoniŋ u tubukadaka-hinakawaak adi kibibo Bepaŋdi me u tubukadaka hinek tibaak. Bepaŋ'walaŋ yoli uŋgoniŋ woŋ adi nemek netok gigit yoŋa kahileguk. Ala yoli uŋgoniŋ woŋ adi hidikuyoŋ.

¹⁸Hidi welehek mu talamukaneŋ. Hidi'walaaniŋ nebek niŋdi kwetfoloŋ mede nadidahi tiŋa na me nadinadinenit nadiŋa kaŋ, fiit timeŋ adi me nadinadinit mokit mintaluwaak. Unduŋ tiŋa mindaŋkade Bepaŋ'walaŋ nadinadi fuliŋgoŋ u kedem nadiwaak. ¹⁹Kwet diniŋ nadisu-fuliŋgoŋ diniŋ mede u Bepaŋdi nadiune folooŋnit mokit tilak. Youkudip Mede niŋ indiiŋ hatak.

“Me nehitok nadiune nehi nadisu-fuliŋgoŋhinit tiŋiŋ adi Bepaŋdi nadiyemiŋa kweleyouhep tiyembune maaneŋ tobogoŋ fooŋ talik lohiŋiŋ.”

^a 3:10 Jesu adi yot mamaŋ diniŋ daŋiniŋ.

²⁰Tiņa niņ indin: “Wapum adi kwetfoloņ me nadiſu-fuliņgoņhinit diniņ mede nadiune foloņnit mokit tilak.”

²¹Ale hidi kwetfoloņ me wohiye yotiloņ hidetok nadiune loloņnit mu tuluwaak. Nemenemek u hiditok gigit. ²²Pol, Apolo tiņa Pita indi hiditok gigit. Tiņa undugoņ kwetfoloņ nemenemek hogohogok, hatihati be kumuņ, indidegoņ hatak be kougoņ mintawaak, u hogohogok hiditok gigit. ²³Hide adi Kilistodok gigit kaņ Kilisto adi Bepaņdok gigit.

Bepaņdi kwanainikdok tuwolit niniutumbawaak

4 ¹Unduņ doktiņa hidi inditok nadiune Kilisto’walaņ tipilapilaye be Bepaņ’walaņ mede hebiņiņ hakuk diniņ kadokome tibaak. ²Kaņ kadokome adi didimeniņgoņ hati kwanainedok niņit. ³Ala natok indin yobit. Hidi bek be mebop niņdi kwanai tilat wendok kamekaaņ mede yodapmaneņ u nadiwe foloņ mu tibek. Tiņa na maaņ mebine tuwot mu yobit. ⁴Na yomne nemu nadilat, iņgoņ oņ, wendok yomnit mokit hatilat tuwot mu yodok. Nu’niņ mebine tubudakaledok kubugoņ hatilak adi Wapum hogok. ⁵Ale hidi mebi tubudakaledakale gehiņgehiņ mu tineņ. Wapum ne busuwaaņ nemek hebihat tilak u wanaņ fiyataņakiyewaak. Tiņa me welehiķ gineņ nemek hebihatak u wanaņ tubuminta-dapmawaak. Tiņa nai uņaņiņ Bepaņdi me hogohogok titiņnikdok tuwolit niniutumbawaak.

Poldi Kolin me yeniņfoko tuguk

⁶Notneye, mede u yolat adi Apolo inde foloņ youdihija yolat. Unduņ doktiņa hidi indi’walaņkade mebi indin kaņila nadidakaleneeņ: Youkudip Mede foloņ tuwolit yoņit u kalakapmeeņ nemek hide nadigoņ tiņa mu titalodok. Unduņ tiņa kwetfoloņ me noli niņatiloņ noli niņatiloņ sigihik mu tiņalooneņ. ⁷Be du me loloņnit iitdok nedi ganiņdapmaguk? Be du nemenemek ikamiņ uņoņ maņgoņ niņ u Bepaņdi mu gamguk? Moņ, u agaņ gamgidibagak kaņ du maņgoņde nadiune mu gamguk dabugoņ tubune yofitet tihatilaņ? ⁸Hidi adi hide nemenemek tiin u yabunadiņa hidetok nadiune loloņnit mu titiņdok iņgoņ oņ, hidi adi unduku tihatiin! Unduņ doktiņa hidi agaņ tuwot hinek-ku tigiņ hatiin oņ! Agaņ bombon duhuduhuhinit hinek-ku tugumun yo nadiņa hatiin! Hidi indi agaņ nilakapmeeņ mapme mintagiņ! Biyagoņ kuyoņ, hidi biyagoņ mapme tinetigiņ ala indi hidut kiula mapme hogohogok tiņa ikanim.

⁹Nu nadiwene Bepaņdi Aposeł indi me fofoņhinit hinek nipmeguk tilak, eņ kwadidok gigit tiņit nabugoņ tilak. Biyagoņ kuyoņ, wanakaņ hogohogok aņelobe, be medi nibune kumuņdok gigit hinek tiyam. ¹⁰Metamdi nibiin kaņ Kilistodok tugumun indi me kaulehi nabugoņ tilak. Indi gweheyehi eņ fofoņhinit nadinimiin. Kaņ hidi hidetok nadiune Kilisto’walaņkade youdihija hatiin tilak, doktiņa hidi agaņ me loloņhinit

ej fafaŋehi tigiŋ hatiŋ oŋ! ¹¹Indi nanaje imedok map kisaŋ tugumundi tihatiyam, tiŋa dahidahinit mokit ej kwadi, folofigita foloŋ be yokwet ikulemanit mokit hatigumundi hatiyam. ¹²Be nemenemek kabekabe yehitubu-mintadok indi inde kohonikdi kwanai tiyam. Ej ninisuwambat tiŋ heki u kibikoŋ kahaŋ tiyemam, ej nindihi tubukadaka tulune indi kibi toboniŋ nadikulema tam. ¹³Niniŋkadakalune indi kibi toboniŋ yeniŋtubugweheye tiyam, tiŋa indi adi metam wanakaŋ hogohogok adi'walaŋ gilegilem nabugoŋ hinek hatigumundi hatiyam.

Pol adi Kolin kayoŋbop'walaŋ behik

¹⁴Nu mede i youhamulat adi hehitubu-meka titiŋdok moŋ. Yoŋ adi toboniŋ wapmihineye hidi mede haniŋkiliti tilat. ¹⁵Kilisto wou foloŋ gebiŋhiye fee hinek hatihamiŋ, iŋgoŋ behik adi dedin tiŋa fee hatineŋ. Jesu Kilistodok tiŋa Mede Momoŋ haniŋale nu kubugoŋdi behik tugut hatilat. ¹⁶Ale nu'niŋ kayoŋ talik keleeŋ hatidok mede i hanimbe nadineŋ.

Bepaŋ'walaŋ Hatihati Fafaŋeniŋ adi saŋiniŋŋiŋ foloŋ mebi mintadakalelak

¹⁷Nu wendogoŋ hinek tiŋa Timoti, Wapum wou foloŋ mihine momoŋ hatinamulak, adi kuyoŋ hidi'walaŋkade kamewene ulak. Adi Jesu didimeniŋgoŋ nadimilakdi wooŋ nu Kilisto diniŋ Mede Momoŋ taliŋ kayoŋbop yokwet tuwot yenindidimelat u tubukaikaŋ hanimbune nadineŋ.

¹⁸Hidi'walahi nolidi Pol nu mu baat yoŋa mede kiyokiyo tiŋa nehitoŋ nadiune loloŋ tilak. ¹⁹Nu adi Wapumdi nadiune tuwot tubune nai muniniŋ hinek hidi'walaŋkade waat. Nu wooŋ me gifoko heki weŋ'walaŋ medehik mu nadiwaat. Mokoŋ. Nu adi adi'walaŋ saŋiniŋhik dediniŋgoŋ u kakaŋdok waat. ²⁰Bepaŋ'walaŋ hatihati fafaŋeniŋ adi mede foloŋ moŋ, adi saŋiniŋŋiŋ foloŋ mebi mintadakalelak. ²¹Kaŋ hidi nu maŋgoŋ talik foloŋ hidi'walaŋkade bubuŋdok yonadiŋ? Welekulema talik foloŋ welenedi hinek habukahileŋ kulemaŋgoŋ bubuŋdok nadiŋ, be hanihehitubu-didimedok nadiŋa kwadinit busuwadokbe nadiŋ?

Nemek kadakanŋ mintaguk u indiŋ tubudidimedok

5 ¹Nu kahat indiŋ adi biyagoŋ yobu nadilat: Nemek hogoli niŋ mintaguk woŋadi me Bepaŋ mu nadimiŋ hekidi maŋ tuwot mu tineŋ undiniŋ hinek lekiŋgoŋhik foloŋ mintaguk hatak. Me niŋdi beu'walaŋ tamŋiŋ dut kefile tilak wendok yolat. ²Kaŋ hidi maŋgoŋde nemek undiniŋ mintag halune kakabeleeŋ sigitiŋalo kisaŋ tiŋ? Hidi bulanŋgoŋ nadiŋa me nemek tuguk u kelekatne tigiŋ. ³Nu foloonedi kweetniŋgoŋ hatilat iŋgoŋ welenedi hidut wooŋ hatiŋa me kadakanŋ tuguk adi'walaŋ mede indiŋ yodapmagut: ⁴Hidi Wapum Jesu'walaŋ wou foloŋ bopneŋ adi'walaŋ saŋiniŋ foloŋ

ulodikilitiune welenedi hehikasopnewene ⁵ me u Sadanjdok bikabumimbune sigin gitnem hogok tubukadakawaak. Kaŋ Wapum Jesu bubuŋdok nai dulaune munabuliŋij hogok Bepaŋdi kedem kahilewaak.

Nemek kadakanij liliwenekula hatidok

⁶Nemek undinij hakabelelune sigihik tiloiŋ doktiŋa nadihambene tuwot mu tilak. Makaye dinij buukaŋŋij adi nemek kuyanij-kabe ingoŋ muhila folooŋ foloŋ gomimbune heyam kaŋ sinintaune bukadapmalak u mube nadiiŋ? ⁷Ale buukaŋŋij u kibidatikulune folooŋdi buukaŋ mu tibaak. Hidi'walaŋ lekiŋgoŋhik foloŋ buukaŋ u liliwenekula walanij hatiyaneeŋ. Tiŋa indij nadineŋ. Indi'walaŋ yahehewenik dompa mihiniŋ,^b Jesu kuyoŋ, kibikoŋnik kumunguk doktiŋa walanij hatiyam. ⁸Wendok Guletŋij^c itnene nemek buukaŋ u beyakukaneem. Kadakanij hogoli wendinij buukaŋ u moŋ yoŋa nemek walanij eŋ didimenij wendok folooŋ kobaŋ behatiŋa guletŋij iitdok.

Kadakanij titiŋ heki adi biyabu titiŋdok

⁹Nu koom pepa niŋ indij kamehamuŋgut: “Hidi metam siloda tiŋa kefilefile tiŋ gut nemek tinakibikibi be menot mu tiyaneeŋ.” ¹⁰Nu adi kwetfoloŋ me nadisukilitihinit mokitdi hatifilefile tiŋ eŋ tinakibida tiŋ eŋ me bomboŋ noli'walaŋ yabusiŋoda tiŋa kubo tiŋ eŋ me bepaŋ yalayalaŋ yeniutumbaiŋ u biyabu mu titiŋdok haningut. Mokoŋ. Hidi kwet i bikabuhinakaŋ kedem metam undihi biyabuneŋ. ¹¹Nu adi mebi indijdok youhamgut: Mede Momooŋ nadiŋ hide'walaaniŋ nohik niŋdi siloda foloŋ kadakawaak be tinakibida tibaak, be yabap eŋ tubuhi nemek undihi behatibaak, be kubo kaka tibaak, be ime fafaŋeniŋ nanaŋ molo, be me mede suuk foloŋ youla beŋa yauna yohautawaak: me undinij u bikabuŋa adut tinakibikibi mu tiyaneeŋ. ¹²Nu me kayoŋbop magineŋ hatiŋdok maŋgoŋdebo yo youle tugut? Hide'walaŋ lekiŋgoŋhik gineŋ Bepaŋ'walaŋ Mede Momooŋ nadinadi hati-tiŋ heki'walaŋ yom mede yobu tuwot tibek. ¹³Eŋ magineŋ hatiŋ dinij yom mede adi Bepaŋdi yobaak. Ale hidi indij taneŋ. Youkudip Mede i keŋeŋ “kadakanij titiŋ adi bikabune lekiŋgoŋhik gineŋ adi mu hatiluwaak.”

Yom bibiŋ dinij mede

6 ¹Hidi'walaaniŋ niŋdi noliŋijdok yom mede kame hatibek, adi mede u me didimehi nadisukilitihinit'walaŋkade

^b 5:7 Yahehewenik dompa mihiniŋ u indijdok yolak. Koom Isilaehidi Isip kwetneŋ folofigita kwanai tuwaŋjit mokit hatitulune Bepaŋdi yehitubu-lodadok yenimbune dompa mihiniŋ ulaŋa naŋgatŋij yeme foloŋ hafiyegiŋ. Kaŋ dompa naŋgat wendi yahehewe tiyembune aŋelodi mu widikumunguk. Welewele u mintaguk dinij folooŋ mindaŋ Jesu'walaŋ mintaguk, tiŋa adi negoŋ yahehewenik hatilak. ^c 5:8 Woŋ adi Aŋelodi Yabukiyondaŋ Yalapakmeguk dinij hinamuni.

kameeŋ yotubudidimedok wabiŋa me hogohi, Mede Momoonŋ mu nadiiŋ'walaŋkade tiŋa uune tuwot be tibek? ²Me didimehi nadisukilitihinit indi hatigene kougoŋ me hogohi Mede Momoonŋ mu nadiiŋ adi'walaŋ mede yodapmaneem, u mube nadiiŋ? Tiŋa undugoŋ hatigene kougoŋ kwanai undiniŋ tineem doktiŋa hide'walaŋ mede suwalisuwali^d kabe undihi mintalune hide tuwot mube yotubudidimeneŋ? ³Indi adi aŋelo heki'walaŋ mede maanŋ yodapmaneemdi nemek fiili diniŋ mede mintaune dedinŋ tiŋa tubumalabudanim? ⁴Nemek filidok mede mintaune hidi maŋgoŋde kayoŋbop agaŋ tigiŋdi me nadiyembu fofonŋit tilak undihi'walaŋ beŋa uune yodapmahiŋ. ⁵Hidi mede u nadiune mekaŋgoŋ tibekdok hanilat. Hidi adi medehik beŋa hide'walaŋiŋ lekiŋgoŋhik gineŋ me nadinadinit'walaŋkade wooŋ medehik yotubudidimedok hatak. ⁶Kaŋ hidi dedinŋ doktiŋa unduŋ mu tiŋiŋ? Hidi adi toboniŋ me nohik nadisukilitinit u nagila wooŋ me nadisukilitinit mokit adut yomhik yotubudidime tiŋiŋ. Wondi kedom mu tilak!

**Metam kadakanŋ titiŋ adi yadi Bepaŋ'walaŋ
Hatihati Uŋgoŋiŋ u mu kahileneeŋ**

⁷Hidi'walaŋ mede mintalak u kiyap'walaŋ moŋgola wooŋ mede titiŋ wendi Bepaŋ'walaŋ Mede Momoonŋ foloŋ hatihatihik diniŋ saŋiniŋ ulatiŋa folak. Hidi'walaŋ lekiŋgoŋhik foloŋ nolidi nemek hogoli be nemek mu titiŋ u tihambune kibi toboniŋ mu timiŋa hogok biune mube halek? ⁸Bepaŋdi u kaune tuwot tibek iŋgoŋ hidi adi nemek hogoli mu titiŋ be kubo kaka u metam nohiye nadisukilitihinit aditok tiyemiŋiŋ. ⁹Kadakanŋ titiŋdi Bepaŋ'walaŋ Hatihati Uŋgoŋiŋ maaneŋ fofondok tuwot mu tilak, u mube nadiiŋ. Hidi welehiŋ mu talamukaneŋ. Metam indihidi yadi Bepaŋ'walaŋ Hatihati Uŋgoŋiŋ u mu kahileneeŋ: metam kefiŋiŋ tiŋiŋ, be yabap niutumba hatiŋiŋ, be metam hekimalamdi kubo talik gineŋ wooŋ tifiŋiŋ tiŋiŋ, be metam siloda tiŋiŋ, be me nehigoŋ nemek mekaŋ mu titiŋ u tiŋiŋ ¹⁰be kubo titiŋ, be tinakibida tiŋiŋ, be ime fafaŋeniŋ kisaŋ naaŋ nadibubuye tiŋiŋ, be yalaŋ mede yotuwatuwale yawiŋiŋ, be titaboloŋet tiŋa mik-kwadi tiŋiŋ. Metam undihidi Bepaŋ'walaŋ Hatihati Uŋgoŋiŋ tuwot mu kahileneeŋ. ¹¹Kaŋ noli hidi koom undihigoŋ hinek hatigiŋ. Ya agaŋ hehiyouteliŋit, eŋ welehiŋ tubuwalandaŋit, tiŋa hehitubu-didimeune yomnit mokit tigiŋ. U Wapum Jesu Kilisto wou foloŋ Bepaŋnik diniŋ Munabulidi unduŋ tihamguk.

Silodadok mede

¹²Nemek hogohogok u titiŋdok tali kedom hatnamulak. Iŋgoŋ oŋ, nemek hogohogok u tibe wendi tuwot mu nehitubu-lodawek. Nemek

^d 6:2 Mede suwalisuwali i foloŋ moŋ. Mede hogohi, kuyahikuyahi wendok yolak.

hogohogok u kedem titindok hatnamulak, ingon on, nemek niñdi gigne tiña nabudokoune aditok tipilapilaye adi mu timimbit. ¹³“Kale nanañedi kumonik miñdok gigit, eñ kumonik miñdi kale nanañedok gigit.” Mede u biyagon yoin ingon hatigene Bepañdi lufomnikon yehitubu-kadakaune dapmademeek. Foloonik adi metam keffile titindok mon, uyadi Wapumdok gigit. Eñ Wapum adi foloonik dinin molom. ¹⁴Ala Bepañdi Wapum tubukaikaguk undugon hinek sanininjindi indi maan nihitubu-kaikawaak.

¹⁵Foloonik adi Kilisto dut kiula kubugon tilak, u mube nadiin? Ale Kilisto dinin foloon u detiña tinawoon talitam dut galinene kubugon tibek? Unduñ mon. ¹⁶Kañ hidi indin mube nadiin. Me niñdi talitam nin dut woon galiune adi agañ welehek be foloohik kubugon tamuk. Youkudip Mede nin indin hatak: “Adi lufomdi kubugon tiña hatidemeek.” ¹⁷Eñ fukuniñ indin, me nin adi Wapum’walañkade woon galiña welenñdi be munabulinjindi adut kiulune kubugon tilak.

¹⁸Hidi adi siloda tiña keffile titin u kakiyondaan sigilulum tiyemaneen. Me niñdi nemek kadakanin noli tilak wendi foloon mu tubukadakalak. Eñ keffile tilakdi ne’nin foloon biyagon hinek tubukadakalak. ¹⁹Be hidi indin u mube nadiin: foloohik wonadi Ungonin Munabuli’walañ silonyot. Adi hidi’walañ foloohik maanen itoudok Bepañdi kamehamguk. Ale hidi yadi welehek be foloohik dinin molom mon. ²⁰Hidi adi Bepañdi tuwanin lolonit hinekdi agañ hehituwaguk, doktiña foloohikdi nemenemek hogohogok tuluwaak wondi Bepañ wougigit nintilolon tuluwaak.

Hekimalam titindok mede

7 ¹Yon adi hidi pepa ginen yonadi youla kamenamgin. Wendok kibikon indin tubu-udane hambe nadineñ: Me nin adi tam mu nagila hogok hatibe nadiña kedem hatibaak. ²Ingon on, siloda tiña kadakanin tineeneñ doktiña me nin adi tamnin molomgon nagilaak. Eñ tam nin adi undugon yohoi molomgon nagilaak. ³Me dunin folooge adi tamge’walañ. Kañ tam dunin folooge adi yohoge’walañ. Unduñ doktiña tam du folooge u yohoge kamehep mu timimbaan. Be me du maan folooge u tamge kamehep mu timimbaan. ⁴Mangonde, tam du folooge dinin molom u da hogok mu tilañ, yohogedi maan tilak. Eñ me du folooge dinin molom u da hogok mu tilañ, tamgedi maan tilak. ⁵Unduñ doktiña hekimalam hidi foloohik kamehefit mu taneen. Hidi ninadi kwanai tine nadiña baigon, welehubugon tiña nai muninin kameheña ninadi kwanai tiyaneen. Tiña kotigon mindañkade foloohik u kedem mongola kiukaneen. Nainit mokit kaka hatilune Sadañdi tikamanda tihambune gweheyeneeneñ doktiña unduñ hanilat. ⁶Mede won adi hehitubu-lodadok nadiña hanilat. Eñ mede yendi yodoko mede mu tilak.

Metam hekimalam mu tiņa hogok hatiņņ ej metam kahat hekidok mede

⁷Na welenedi hinek indiņ nadilat. Metam hogohogok hidi dediņ tiņa nu hatilat indigoņ tam mu tiņa hogok hatiņaneņ. Iņgoņ oņ, Bepaņ adi me inditok siloņ mebimebi molomolom nimilak. Me niņdok siloņ mebi niņ, ej niņdok siloņ mebi niņ, unduņ nimilak.

⁸Metam hekimalam mu tiņa hogok hatiņņ ej metam kahat hekidok adi indiņ yolat. Adi yadi nu hatilat indiņ hatibu utumbawaak. ⁹Iņgoņ oņ, molomolom hatiņa welehikdi kedem tuwot mu fafaņeņ hatineņ, unduņ nadikaņ hekimalam kedem taneņ. Siloda tiņa metam kefile titiņdok galikidi hehitubu-kadakawaakneņ doktiņa hekimalam kedem tiņa hatiņaneņ.

Hekimalam kikabi mu titiņdok

¹⁰Eņ hekimalam hiditok adi yodoko mede indiņ yobe nadineņ. Iņgoņ u na'walaņ mede hogok moņ. Woņ adi Wapum'walaņ mede. Tam yohohiyehinit, hidi yohohiye mu biyabaneņ. ¹¹Eņ agaņ undugoņ nobu tiņakaņ adi yohot gitipmuņ mu titiņdok. Adi hogok hinek hatiņaneņ be kotigoņ wooņ yohohiye dut tomboyoutneņ. Eņ me tamhiyenit hidi tamhiye mu yehikelektneņ.

Metam nadisukilitihinit ej nadisukilitihinit mokitdi hekimalam tiņ adi'walaņ mede

¹²Kaņ metam noli hogohogok hiditok adi indiņ yolat (u nadiune Wapum'walaņ mede mu tibek, na'walaņ mede hogok tibek.) Hidi'walaņiņ me niņ adi tamņiņ Jesu mu nadisukilitimilak ala tam wendi yohoidut wanaņ hinek hatidok yobune kaņ yohoidi tamņiņ u mu kelekulaak. ¹³Be tam niņ adi yohoi Jesu mu nadisukilitimilak ala me wendi tamņiņdut wanaņ hinek hatidok yobune kaņ tamņiņdi yohoi u mu kelekulaak. ¹⁴Hidi a nadiiņ. Bepaņdi tam nadisukilitiņiņ kaņ nadiune yohoi agaņ walandaguk tilak. Tiņa undugoņ me nadisukilitiņiņ kaņ nadiune tamņiņ agaņ walandaguk tilak. Tiyaugene wapmihihie adi Bepaņ namanda gineņ kadakanijnit hatineņ ala. Iņgoņ oņ, nai indidegoņ adi yadi uņgoņiņ hatiņiņ.

¹⁵Me be tam nadisukilitinit mokitdi noliņiņdok nadibedi mu tiņa kaka bikabudok yo gigneune kaņ mu kamekibidayaneņ. Tiņa undugoņ bikabudok kamehep mu hatak. Bepaņ adi kulemaņgoņ hatidok hehikiutak. ¹⁶Kaņ tam du yohoge dediņ tiņa nagilune Wapum'walaņ kayoņbop gineņ tomboyoulaak u du mu nadilaņ. Be me du tamge dediņ tiņa nagilune Wapum'walaņ kayoņbop gineņ tomboyoulaak u du mu nadilaņ.

Bepaņ'walaņ mede tagimneņ hatihatidi folooņ hinek tilak

¹⁷Metam hogohogok hidi Wapumdi hatihati dediniņ hatidok haniņguk ej Bepaņdi titiņ dediniņ titiņdok haniņguk indigoņ Wapum'walaņ

kayonbop gineŋ hatiyaneerj. Nu mede iŋakonj yokwetkwet yaunja Wapum'walaŋ kayonbop hogohogok yenilat. ¹⁸Me niŋ adi Judahi'walaŋ fek agaŋ koom binek tuguk kaŋ hatilune Wapumdi netok gigit titiŋdok niŋguk adi fek u mu tubufilaak. Be me niŋ adi Judahi'walaŋ feknit mu hatugukdi fek mu tibaak. ¹⁹Feknit be feknit mokit hatihati wendi folooŋ mu tilak. Bepaŋ'walaŋ mede tagimneeŋ hatihatidi folooŋ hinek tilak. ²⁰Hidi adi hatihati dedij hatilune Bepaŋdi netok gigit titiŋdok haninguk wendok tuwot hatiyaneerj. ²¹Me be tam du tipilapilaye kwanai tuwaŋit mokit binek tihatilune Bepaŋdi netok gigit titiŋdok ganinguk kaŋ wendok welemulap mu tibaaŋ. Be tipilapilaye kwanai tuwaŋit mokit gineniŋ gehifiyatne ganinadiune kedem yodapmawaan. ²²Nediyerj tipilapilaye kwanai tuwaŋit mokit tihatilune Wapumdi netok gigit niŋguk adi yadi Wapumdok gigit. Tiŋa Wapum'walaŋ namanda gineŋ tipilapilaye kwanai-me tuwaŋit mokit kotigoŋ mu hatilak. Kaŋ niŋ adi Wapumdi tipilapilaye kwanai tuwaŋit mokitneniŋ fiyalune hamap gineŋ foguk. Eŋ niŋ adi hamap gineŋ hatiguk u nagitiŋa Kilisto'walaŋ tipilapilaye-me kameguk hatilak. ²³Hidi yadi agaŋ tuwahik loloŋnit hinekdi hehituwaŋit doktiŋa kwetfoloŋ medok kwanai tuwaŋit mokit mu tineerj. ²⁴Notneye, indi hogohogok koom hatihati dedij hatinene Bepaŋdi nibunadiŋa netok gigit niniŋguk wendok tuwot hinek Bepaŋdut hatiyaneem.

Hekimalam hatihati be hogok hatihati wondi yom mu tilak

²⁵Metam hekimalam mu tiŋa hogok hatiin, hiditok Wapum'walaanij yodoko mede nemu hanimbit. Ingoŋ Wapumdi nadinambune tuwot tubune siloŋ tobogoŋ tinamguk doktiŋa nu nadilat u kedem hanimbit. ²⁶Nai indidegoŋ malabumuŋ fee mintalak doktiŋa mewoi hidi kedem hatiin undugoŋ hatiyaneerj. ²⁷Tam agaŋ yanagikiŋ hidi biyabudok nadisuŋa talik mu lohineerj. Be me tam mu tiŋa hogok hatiin, hidi tam yanagitdok mu yoyaneerj. ²⁸Tam agaŋ nobu yanagitnerj kaŋ wendi yom mu tilak. Tiŋa waabihemdi undugoŋ yohot agaŋ nobu tibek kaŋ wendi yom mu tilak. Ingoŋ oŋ, hekimalam tigiŋ hidi'walaŋ hatihatihik foloŋ nemek malabumuŋ mebimebi mintawaak. Nu adi unduŋ dok-ku tiŋa haniŋkilitilat.

Nadisuhikdi kunilit Wapum'walaŋkade kameŋdok

²⁹Notneye, nai agaŋ dapmahinakaune muniniŋ-kabe hinek hatak. Doktiŋa me tamhiyenitdi tamhiyenit mokit dabugoŋ hatiyaneerj. ³⁰Eŋ makat kobulabulaye tiin hidi adi makat wabiŋa hogok hatiyaneerj. Eŋ nadifo tiin hidi adi me nadifo mu tiin undihi hatiyaneerj. Eŋ me bomboŋ tuwaiŋ hidi adi bomboŋnit mokit nabugoŋ hatiyaneerj. ³¹Me kwetfoloŋ nemek filidok kwanaineiŋdi nadiune wendi wapum mu tuluwaak. Nai muniniŋ nemenemek hogohogok u kwetdut liwedapmaneerj.

³²Hidi adi nemek wendok be wendok nadibedinit mokit hatidok nadiņa hanilat. Me tamnit mokit adi Wapumdok hogok nadilak. Tiņa dedij tubune Wapumdi nadiune kedebawek yoņa nadilak. ³³İngonj me tamnit adi yadi kwet diniņ nemek fiili wendok eņ tamņijdi nadimimbune utumbadok wendok maan nadibedilak. ³⁴Adi wendowendok tiņa nadisurņij fifile tilak. Kaņ tam yohoi mu tiņa hogok hatilak be waabihem adi yadi Wapumdok hogok nadiņa folooņ bek, be munabuliņij kiulaņa Wapum'walaņkade hogok kameune uune didimeniņ hatilak. Kaņ tam yohoinit adi yadi kwet diniņ nemek fiili wendok eņ yohoidi nadimimbune utumbadok wendok maan nadibedilak. Adi wendowendok tiņa nadisurņij fifile tilak. ³⁵Nu adi hogok hidi hehitubu-lodaaņ hanilat. Kamehep tihamuņa moņ. Hide nadisuhikdi giyoņgiyone mu tiņa kunilit Wapum'walaņkade kubogoņ kamenenđdok wendok hanilat.

³⁶Me wabibeu niņ adi waabiņij agaņ waabihem tubune kamekibida hatidok nadiune tuwot mu tubune me foloņ kedem kamewaak. Adi unduņ tubune wendi yom mu tibaak. ³⁷Kaņ me wabibeu niņ adi welenđi waabine me nemu nagila, hogok hinek hatiluwaak unduņ nadisuņa nadibedi mu tiņa yodapmaune u maan tuwot tibaak. ³⁸Unduņ doktiņa me wabibeu adi waabiņij me nagitdok nindapmawaak adi titiņ momooņ tibaak. İngonj wabibeu niņ waabiņij me nebek nemu nagitdok yoņa kahilewaak adi yadi titiņ momooņ hinek tibaak.^e

Tam kahat heki'walaņ mede

³⁹Kaņ tam niņ adi yohoi hogok hatilune yohoidut galiņa hatiluwaak. Hatigene yohoi kumumbune adi kedem, me u be u nagilene nadiņa kedem nagilaak. İngonj kaka adi moņ, me nediyeņdi Wapumdut hatilak uņak kaņ nagilaak. ⁴⁰Nu adi indij nadilat, tam u adi yohoinit mokit momooņ hatilak undugoņ hinek hatiluwaak. Mede i yobene Bepaņ'walaņ Munabulidi maan nadiune tuwot tilak nadilat.

Kale muni bepaņ yalayaļadok heyemiņ wendiniņ mede

8 ¹Mede noli youtnamgiņ wendok indij yolat. Me nolidi indij yoņ, indi adi bepaņ yalayaļadok kale dumuņ heyemiņ wendiniņ mebi agaņ nadiyam. Unduņ yoņa nehitok nadiune loloņnit tilak. İngonj mebi nadinadi hogokdi folooņ mu tilak. Welesiloņdi biyagoņ nihikiutak. ²Me niņdi “Na nemenemek agaņ nadidapmalat” yolak, me undiniņ adi nadinadi kedehi noli moņgotdok talik kamehep tilak. ³Eņ me niņ adi welenđi Bepaņ kahilelak adi yadi agaņ Bepaņdi nadimilak.

^e 7:38 Gilik mede Poldi iņgoņ youkuk adi mebi yehilak doktiņa mede lufom youkumun. Niņ adi wahij youkumun eņ niņ iņgoņ youkumun. “Unduņ doktiņa me kuya niņdi tamgigit ulimiņgiņ u nagilaak adi titiņ momooņ tibaak. Eņ me kuya niņdi tam mu tiņa hogok halaak adi yadi titiņ momooņ hinehinek tibaak.”

⁴Unduŋ doktiŋa kale muni heyemiin wendok indiŋ nadineŋ: bepaŋ yalayaŋa hogohogok kwetfoloŋ diniŋ wendi folooŋ mu tiin. Bepaŋ hinek adi kubugoŋdi folooŋ tilak. ⁵Bepaŋ yalayaŋa kunum gineŋ be kwetfoloŋ hatiŋ mede unduŋ yobune bepaŋ yalayaŋa eŋ wapum yalayaŋa fee kisaŋ hatiŋ tilak. ⁶Ingoŋ indi yadi Bepaŋ kubugoŋdi Betnik hatinimilak. Nemenemek hogohogok i adi'walaaniŋ mintaguk. Tiŋa undugoŋ Jesu Kilisto ne kubugoŋdi Wapumnik hatiŋa nemenemek hogohogok yehitubumintaguk. Tiŋa ne kubugoŋdi hatihati nimbune Bepaŋdok gigit tugumun hatiyam.

⁷Me nolidi u mu nadidakalein. Nolidi koom bepaŋ yalayaŋa hekidok nadiune folooŋ tuguk doktiŋa aditok kale muni hein u naaŋ indiŋ nadisuin: kale dumuŋ yoŋ adi bepaŋ yalayaŋa diniŋ hinek. Adi nadidakalehikdi fafaŋeniŋ mu hatak doktiŋa kale dumuŋ u naaŋ nadiune yomnit tilak. ⁸Kale nanaŋedi Bepaŋdut mu nihibopnelak. Bepaŋ'walaŋ namanda foloŋ kale nanaŋe mu nanim wendi yom mu tilak. Be fiit nanim ingoŋ Bepaŋ'walaŋ namanda foloŋ momooŋ hinek tuwot mu tibek. ⁹Ala nanaŋe ube ube kaka nanaŋdok u hide nadinadinila nayaneen. Hidi unduŋ tubune me nadisukilitihik mu fafaŋelak undihidi habuŋa nadiune kadakawaakneŋ.

Notniye welehiŋ mu tubukadakadok

¹⁰Hidi bepaŋ yalayaŋa niutumba yotneŋ ilaŋa nanaŋe nalune me nadisukilitihik mu kilitilak adi'walaaniŋ niŋdi habuŋa “Nu maŋ adi nalak undugoŋ nawit” unduŋ nadiŋa fooŋ ila bepaŋ yalayaŋadok kale muni hebop tiin u nawaak. ¹¹Hidi'walaŋ titiŋhik be nadinadihik undiniŋdi me nadisukilitiŋiŋ fafaŋe mu tilak u tubukadakawaakneŋ. Jesu Kilistodi notnik u maŋ nagitdok tiŋa kumuŋguk. ¹²Nadiin be? Nohiye noli nadisukilitihik mu kilitilak kaŋ hidi yom u tiŋa adi'walaŋ nadisukilitihik tubukadakaŋ. Kadakaŋiŋ woŋ adi Kilisto-ku timiin oŋ. ¹³Unduŋ doktiŋa nu indiŋ nadilat. Notnedi kale naaŋ yomnit tilak doktiŋa nu kale mu naaŋ hogok hinek hatiluwaat. Tiyaugae unduŋ tibene notnedi undugoŋ tiŋa yom tibaakneŋ.

Aposel heki'walaŋ tuwahik diniŋ mede

9 ¹Hidi titiŋne dediŋ kaŋ? Nemek niŋdi nembe nehitehilak? Moŋ. Nu yadi maŋgoŋniŋ titiŋdok nadilat u undugoŋ hinek tilat. Be nu Aposel mube hatilat? Be nu Wapumnik Jesu mube kagut? Be nu Wapum'walaŋkade ulodiŋa hati kwanainewe kahaŋ tihamguk wendiniŋ folooŋ hidi mube hatiŋ ale? ²Biyagoŋ, nu metam yokwet noli'walaŋ aposel mu binek hatilat, ingoŋ hiditok adi biyagoŋ hatilat. Aposel kwanai tugut diniŋ fek Wapum'walaŋ kahaŋ folooŋ mintagiŋ hidi uŋakoŋ.

³Me nediyen nu'walaŋ mebine kanadi tiŋa yoŋ aditok mede adi indiŋ tubu-udaneyemilat. ⁴Be noli indi, hidi'walaaniŋ nanaŋe ime mu

mongonanandok kamehep be tinimging? ⁵Be indi maan tamniye Wapum nadisukilitimiin undihi yanagila aposel noli en Wapum'walaŋ kwayaniye tiŋa Pita hekidi tiin unduŋ Mede Momooŋ kwanai titindok wanaŋ kedem mube yaunim? ⁶Be Banabas indi hogok kohonikdi kwanai tiŋa nanaŋe ime be tinahukutnik tubumintaan wendi nihiulihune hatiyademeet?

⁷Me mikme hatiin adi yadi tebe bomboŋ u nehi'walaŋ muneenŋdi mu tuwaiŋ. Tiŋa undugon metam diniyeti tubune nanaŋe folooŋ mintan ilune nehi monŋo naiŋ. Tiŋa metam makau en kale meme yabu-ulidokooŋ adiniŋ nom u nehi kahila naiŋ. ⁸Be i me mede hogok yolat? Yodoko Mededi unduŋ mube yolak? ⁹Moses'walaŋ Yodoko Mede gineŋ indinŋ youkin, "Kale makaudi kwanai tigamuŋale kilihikit nawe tubune kamehep mu timimbaan." Bepaŋ adi kale makaudok hogok be nadisuŋa yoguk? ¹⁰Be Bepaŋ adi metam inditok maan nadisuŋa yoguk? Mede yon adi metam inditok hinek nadiŋa youkin. Ale metam nediyeŋ fiye dinihe tiin be kuyaŋ maan nanaŋe youli yetiin adi adi hogok mu tiin. Adi yadi nanaŋe folooŋ mintane nanaŋdok nadisuŋa diniyetiin. ¹¹Indi hidi'walaŋ munabulihikdok nanaŋe diniyetigumun wendi folooŋ agaŋ mintalak. Kaŋ hidi indi'walaŋ siginik tubulodadok mede wendok maŋgande nadiune tuwot mu tilak.

¹²Hidi'walaŋkade metam nolidi wooŋ Kilisto'walaŋ Mede Momooŋ haniin aditok nanaŋe ime be tinahukut bomboŋdi kasop tiyemdok tali u kedem hatak. Kaŋ noli hidi'walaŋkade kwanai timentimeŋ tububihila tugumun indi adi nemek wapumgoŋ hinek tinimdok tuwot tilak. Inŋon indi nemek fiili wendok haniŋgiginene Kilisto'walaŋ Mede Momooŋdi fowaakneŋ yoŋa siginik dininŋ malabumuŋ u nadikabeleenŋ fiit fafaŋe tiŋa hatigumun. ¹³Kaŋ Judahi'walaŋ talitimeŋ Silonyotneŋ kwanai tiin heki adi Silonyot dininŋ nanaŋe monŋokiin u mube nadiin? En alta foloŋ kale muni hein heki adi yadi metamdi kale silondok hein u daneŋ monŋokiin u mube nadiin? ¹⁴Undugon Wapum'walaŋ Mede Momooŋ yohautain heki adi yadi metam Mede Momooŋ yenhautaune nadiin adi kasop yeihulihidok Wapum negoŋ yoguk.

¹⁵Nu adi hidi'walaŋniŋ bomboŋ monŋotdok talik kedem hatnamunguk inŋon u nemu monŋokut. Kaŋ yon adi hidi indidegoŋ tububihila nehituwadok mu youtat. Moŋ hinek. Tiyaugene hidi nehituwaneeneŋ, be Wapum'walaŋ Mede Momooŋ tuwanit mokit hatinila yohautalat wendiniŋ nadifone nebek niŋdi ulatifonambaakneŋ, ale timeŋ kumuŋgidibawetugut. Maŋgande, nu Kilisto'walaŋ Mede Momooŋ yohauta kwanai u tuwanit mokit tilat doktiŋa nadifo tilat. Kwetfoloŋ tuwane monŋole Wapum'walaŋkade nadifone be youtumbane wapum hatak u fiit tinambaakneŋ.

¹⁶Kaŋ nu Wapum'walaŋ Mede Momooŋ u metam yenhautaan na sanjiniŋnedi Mede Momooŋ unduŋ hinek yolat u tuwot mu yobit. Mede

Momooŋ yohautadok kwanai u Wapumdi namuŋguk doktiŋa gicineŋ yohautaluwaat. Kwanai u bibiŋ mu tibaat. Yakee! Nu kwanai u nobu biwene adi Wapumdi kibikoŋ dedin hinek tinambaak? ¹⁷⁻¹⁸Unduŋ doktiŋa nu kwanai wendiniŋ tuwaŋiŋ moŋgolitdok tuwot moŋ. Maŋgande, nu kwanai u na nadinadinede mu tilat. Wapumdigoŋ nanimbune tilat. Unduŋ doktiŋa nu tuwaŋiŋ maŋgoŋ moŋgotat? Woŋ adi indin kuyoŋ. Wapum'walaŋ Mede Momooŋ adi tuwaŋit mokit yohautalat. Be Mede Momooŋ yohautadok yotyot yaunŋa Mede Momooŋ yeniyeniŋ tilat. Unduŋ tiŋila wendiniŋ tuwaŋiŋ sigine diniŋ kasop, bombon kedem moŋgotdok iŋgoŋ mu moŋgotat. Unduŋ tiŋa Mede Momooŋ u nadifo foloŋ metam yenilat. Kaŋ nadifo u tilat wendigoŋ tuwane tilak.

Poldi metam feegoŋ yanagitdok kwanai tuguk

¹⁹Kaŋ uŋgoŋ tomboyoula folooŋ hinek niŋ indin hatak. Pol nu foloknenit mokit. Be nu me niŋ'walaŋ tipilapilaye-me tuwaŋit mokit moŋ. Iŋgoŋ nu na metam feegoŋ yanagile Kilistodok gigit tineŋ unduŋ yoŋa adi'walaŋ tipilapilaye-me tugut. ²⁰Ala Juda metam'walaŋ lekiŋgoŋhik gineŋ hatiŋa Judahi'walaŋ titiŋ tugut. Woŋ adi Juda metam yanagitdok yoŋa unduŋ tugut. Tiŋa metam Juda me'walaŋ Yodoko Mede kame hatiŋ adut tomboyoula Yodoko Medenit nabugoŋ hatigut woŋ adi nu na Yodoko Mededok tipilapilaye titiŋdok moŋ ale. Adi metam Yodoko Mede takaliŋ yanagitdok yoŋa unduŋ tugut. ²¹Metam Judahi'walaŋ feknit mokitdi Yodoko Mede mu kame hatiŋ adi'walaŋ baŋamhik gineŋ Yodoko Medenit mokit hatigut adi nu Bepaŋ'walaŋ namanda foloŋ Yodoko Medenit mokit hatiŋa moŋ. Nu adi Kilisto'walaŋ yodoko mede kame hatilat. Ala woŋ adi metam Judahi'walaŋ feknit mokit hatiŋ yanagitdok yoŋa unduŋ tugut. ²²Eŋ yoŋ adi indin, metam gweheyehi baŋamhik gineŋ hatiŋa gweheyen dabugoŋ tugut adi metam gweheyehi yanagitdok yoŋa unduŋ tugut. Metam mebimebi adi'walaŋ lekiŋgoŋhik gineŋ hatiŋa titiŋ mebimebi tugut woŋ adi metam nolidi kadakalune nolidi fiit utumbaneŋ unduŋ nadiŋa tugut. ²³Tiŋa nemenemek hogohogok tilat woŋ adi hogok mu tilat. Woŋadi Wapum'walaŋ Mede Momooŋdi hautaŋ kwetkwet uuŋdok nadi tilat. Ala hatigene kougoŋ na maŋ wendiniŋ kahaŋiŋ moŋgolaat.

Tuwanik momooŋ moŋgotdok gicine tiyaneem

²⁴Niŋ indin u hidi maŋbe nadiŋ. Metam lopne titiŋdok kwetneŋ wooŋ bopneŋ lopne niŋ wou kiyane u tiŋ. Ala indin, me bop be tam bop adi yatuwat tiŋa wanaŋ kiyanenetiŋit ala kiyaneŋ wooŋ nediyeŋ fafaŋeŋ fek kameŋitneŋ timerŋ usuwalak adi hogokdi tuwaŋiŋ moŋgotak. Ale hidi maŋ fafaŋeŋ didimeniŋgoŋ kiyaneŋ wooŋ tuwahik moŋgotneŋ. ²⁵Metam nediyeŋ lopne tikatika titiŋdok nai foloŋ nanaŋe noli kameheŋa toboniŋ hatiŋila lopne tikatika tiŋ. Adi yadi tuwahik fiili liwe tibaak

wendok unduŋ tiin. Eŋ indi adi tuwanik fafaŋeniŋ liwe mu tibaak wendok undugoŋ tihatiyaneem.

²⁶Unduŋ doktiŋa na kaka mu kiyanelat. Fekne kaŋjila kaŋjila didimeniŋgoŋ kiyanelat. Be hamap foloŋ kufait mu tilat. Moŋ. ²⁷Nu adi na'walaŋ foloone didimeniŋgoŋ ulaŋa tifowene na'walaŋ tipilapilaye tilak. Tiŋa metam noli Mede Momooŋ yenihatigene mindarŋkade na wotnenenit mokit tiŋa tuwane mu moŋgolaatneŋ yoŋa unduŋ tilat.

Judahi'walaŋ mede kahatdi inditok munte mede tilak

10 ¹Notneye, Nu koomkwaha Juda me heki indi'walaŋ mamani-papaniyedi nemek tigiŋ wendiniŋ mede kahat tihambe nadinēŋ. Metam hogohogok adi Bepaŋdi mulukwaŋ gineŋ hali talitimeŋ tiyembune wooŋ imēŋgwaŋ meŋegiŋ. ²Tiŋa mulukwaŋ dut imēŋgwaŋdi Imeyout tiyemiŋ wele unduŋ tiyembune Moses'walaŋ kayoŋbop tigiŋ. ³Kaŋ Munabulidi Bepaŋ'walaaniŋ nanaŋe yemguk u wanakaŋ hinek nayagiŋ. ⁴Eŋ Munabulidi Bepaŋ'walaaniŋ ime yemguk u maŋ wanakaŋ nataugiŋ. Munabuli diniŋ kawade adi adut wanaŋ uŋale ime yembune nayagiŋ. Kawade wou Kilisto. ⁵Iŋgoŋ Bepaŋdi metam noli nadikadakayembune kwet fiileŋ uŋgoŋ kumuŋkwanegiŋ.

⁶Mamani-papaniye'walaŋkade nemek mintagukdi inditok munte mede tinimilak. Tiyaugene indi maŋ welenikdi siloda kadakanŋ undiniŋgoŋ tineemneŋ ala nadinadiŋjila hatiyaneem. ⁷Mulabumuŋ u indiŋ doktiŋa mintayemguk. Adi'walahi nolidi bepaŋ yalayaŋaŋ yeniutumbagiŋ. Unduŋ u maŋ mu tiyaneem. Youkudip Mededi indiŋ yolak. "Metam adi fooŋ ilaŋa bepaŋ yalayaŋaŋ niutumbagiŋ, tiŋa hinamuni nadapmaŋ pilali kap miyegiŋ." ⁸Unduŋ tiŋa adi'walahi metam nolidi kefiŋle tigiŋ, tiŋa hakene melenai kubugoŋ gineŋ metam 23 tausen wanaŋ kumuŋdapmagiŋ. Unduŋ doktiŋa indi unduŋ mu tiyaneem.

⁹Tiŋa niŋ maŋ indiŋ. Wapum welen mu talamutdok. Adi'walahi nolidi Wapum talamulune miŋgembetdi yehi-idiune kisaŋ kumuŋgiŋ. ¹⁰Eŋ niŋ indiŋ. Wapum nimunumuŋe mu taneem. Adi'walahi nolidi Bepaŋ nimunumuŋe tubune aŋelo mik molo niŋdi widihikumunguk.

¹¹Ala indiŋ nadidok: adi'walaŋkade nemek mintaguk wendi fek kambiyatnimŋit tilak. Kwet diniŋ nai dapmandok dulalune dikineŋ hatiyam inditok mede kahat i munte youtnimŋiŋ. ¹²Nadinadiŋjila! Nediyeŋ netok na agaŋ tuwot hinek hatilat unduŋ nadi hatigene gweheyeŋ mawaakneŋ ala. ¹³Tikamanda mintahamiŋ wendi gitipmuŋ mu tilak. Tikamanda woŋ adi me noli uŋgoŋ mintayemiŋ. Bepaŋ adi tikamanda mintanimbune nihitubulodadok yokwambundagak u ulihiŋa yahehewehambune tikamanda niŋdi hidi'walaŋ saŋiniŋ diniŋ tuwolit mu kalakapmeŋ hehitifowaak. Moŋ. Adi yadi tikamanda mintahambaak tuwot talik tubumintahambune hidi fafaŋeŋ yalune tikamandadi mu hehitubugweheyewaak.

Bepaŋ yalayaŋ sigilulum tiyemdok

¹⁴Unduŋ doktiŋa, notneye momohi, hidi bepaŋ yalayaŋ sigilulum tiyemaneŋ. ¹⁵Hidi yadi nadinadihinit hatiŋ doktiŋa mede i hanimbe kedem nadidakaleneŋ. ¹⁶Indiŋ, Kilisto'walaŋ Dumuŋ nayamneŋ adi wain kulufe u agaŋ Bepaŋ niutumbaŋ naaŋ Kilisto'walaŋ nangat dut tomboyokam, u mube nadiiŋ? Be belet nayamneŋ Kilisto'walaŋ folooŋ dut tomboyokam, u mube nadiiŋ? ¹⁷Tiŋa indiŋ maŋ, metam feedi belet kubugoŋ hogok wobuwobu tiŋa naaŋ menot tiŋa bop kubugoŋ tiyam.

¹⁸Tiŋa undugoŋ, Judame heki adi kale alta foloŋ muni heyagiŋ u moŋgo naaŋ Bepaŋ niutumbaŋ adut tomboyout tagiŋ. ¹⁹Dediŋ yodok? Kale bepaŋ yalayaŋdok muni heiŋ wendi folooŋbe, be bepaŋ yalayaŋ muni hemiiŋ ne folooŋ hinek? ²⁰Wendok indiŋ nadineŋ. Metam Judahi'walaŋ feknit mokitdi kale muni heiŋ woŋ adi Bepaŋdok mu tilak. Woŋ adi yabap moiniŋdok gigit tilak. Ale nu hiditok indiŋ yolat. Hidi adi yabap moiniŋ hekidut mu tomboyokaneŋ.

²¹Hidi adi Wapum'walaŋ kulufe gineniŋ bunag eŋ yabap moiniŋ'walaŋ kulufe gineniŋ bunag adi mu taneŋ. Be Wapum'walaŋ falik foloŋ bunag eŋ yabap moiniŋ'walaŋ falik foloŋ bunag maŋ mu taneŋ. ²²Indi unduŋ tinene Bepaŋdi kwihitanimbaakneŋ ala! Hidi dediiŋ nadiiŋ, indi'walaŋ saŋiniŋdi adi'walaŋ saŋiniŋ kalakapmelak be?

Metam gweheyehidok nadibedi tiyemdok

²³Niŋ indiŋ, hatihatiniŋ gineŋ nemenemek hogohogok u kedem titiŋdok. Ingoŋ oŋ, nemenemek hogohogok u wanaŋ tidapmanene wendi momooŋgoŋ hinek tuwot mu nihitubu-lodawetik. Nemenemek hogohogok u titiŋdegoŋ ala u wanaŋ tiŋila Mede Momooŋ gineŋ kiulihi momooŋgoŋ tuwot mu tibetiŋ. ²⁴Unduŋ doktiŋa nebek niŋdi ne tubulodadok hogok mu nadiluwaak. Moŋ, noliŋiye yehitubu-lodadok maŋ nadiluwaak.

²⁵I nadiut. Kale dobuboi tiŋneŋ tuwane wooŋ kaka tuwayaneŋ. I hogoli, be i bepaŋ yalayaŋ yotneniŋ unduŋ yoŋa yo nadibedi mu tiyaneŋ. ²⁶Kwetbe, be kwetfoloŋ nemek hogohogok tokiŋa hatak woŋ adi Wapumdi Molom tilak doktiŋa nadibedi mu taneŋ. ²⁷Me Jesu mu nadisukilitimiŋdi yohineŋ hanihehimaneune lone nadiŋa kedem loyaneŋ. Tiŋa kale nanaŋe hehambune kaka nayaneŋ. Hidi wendok nadibediŋa yonadi mu tiyaneŋ. ²⁸Kaŋ hidi kale nanaŋe u binek ila nalune me niŋdi buŋa indiŋ hanimbaak, "Kale yoŋ adi bepaŋ yalayaŋdok muni hemiŋit." Unduŋ yobu nadiŋa hidi u mu naneŋ. Woŋ adi me hanimbihit tibaak aditok nadibediŋa unduŋ tineŋ. ²⁹Kale u naune hide welehik kadakawaaneŋ doktiŋa moŋ. Me hanimbihilaak adi'walaŋ welaŋ kadakawaakneŋ doktiŋa yolat. Nu na walanedi nanaŋe u kedem nanaŋdok nadiluwene me niŋ'walaŋ kamehep mededi tuwot mu

kamehenamuluwaak. ³⁰Nu nanaŋe u Bepaŋ ninadi gineŋ niutumbaarŋ nawene nediyeŋ maŋgoŋde nadikadakawaak?

Poldi metam fee kedeba-utumbaneŋdok kwanai tuguk

³¹Unduŋ doktiŋa hidi kale nanaŋe nanaŋdok be nemek noli titiŋdok Bepaŋ niutumbaarŋ tiyaneŋ. ³²Unduŋ tiŋa hidi Juda metam eŋ Gilik metam be Bepaŋ'walaŋ kayoŋbop lekingoŋhik gineŋ yomnit mokit hatibune adi habuŋa nehi'walaŋ welehiŋ mu kadakawaak. ³³Nu na maŋ undugoŋ metam feedi nadiune utumbadok nadiŋa kwanainelat. Na'walaŋ nemek niŋ utumbadok moŋ. Metam feedi Mede Momooŋ nadiŋa kedeba-utumba tineŋdok kwanai tihatilat.

Poldi Kilisto'walaŋ titiŋ takalidok yoguk

11 ¹Nu Kilisto titiŋniŋ diniŋ talii kaŋ takalilat undugoŋ hidibo nu'walaŋ titiŋne diniŋ talii kaŋ takaliyaneŋ. ²Hidi nu nemek hanindidimegut be hehititiŋenegut u gitagoŋ hinek didimeningoŋ nadisuŋa boihatiŋ. Biyagoŋ, nemek haniŋgut undugoŋ hinek tiŋ doktiŋa hiditok nadifo tilat. ³Agan mede noli i maŋ nadineŋ. Kilisto adi me hogohogok hidi'walaŋ Wapumhik tilak, eŋ medi tamŋiŋ'walaŋ wapum tilak. Kaŋ Bepaŋ adi Kilisto'walaŋ wapum tilak.

⁴Tiŋa niŋ indiŋ, me nediyeŋ kuluŋ mokoŋa ninadi tibaak be Bepaŋ'walaŋ mede nadiŋa yohautawaak adi yadi wapumŋiŋ tubumekawaak. ⁵Kaŋ tam adi undugoŋ mebi hapmuŋ mukufula mu tiŋa ninadi tibaak be Bepaŋ'walaŋ Mede Momooŋ yohautawaak adi yohoi tubumekawaak. Unduŋ tiŋa uŋakoŋ tam mebihik hapmuŋ filakut tiŋ adut tuwolit tibaak. ⁶Unduŋ doktiŋa tam nediyeŋ kwanai u tiŋa mebi hapmuŋ mukufula mu tiŋa tubune kaŋ mebi hapmuŋ filakulimiŋ titiŋdok. Be tam niŋ adi wendok meka tiŋa mebi hapmuŋ mu dobudok nadikaŋ mebi mukufula tiŋa hatiŋila Bepaŋ ninadiluwaak.

⁷Kaŋ me adi Bepaŋ ne'walaŋ namandap tubumintaguk wendi Bepaŋ hebiniŋ yohoutaanŋ niutumbalak doktiŋa me adi kuluŋ mu mokoŋa niutumbaluwaak. Kaŋ tam adi yohoi wou yohoutaanŋ niutumbalak. ⁸Bepaŋdi me tubumintawene tam'walaŋ folooŋ diki mu tiŋa tubumintaguk. Tam adigili me'walaaniŋ folooŋ diki tiŋa tubumintaguk. ⁹I nadineŋ, me adi tam doktiŋa mu tubumintaguk, tam adigili me doktiŋa tubumintaguk. ¹⁰Unduŋ doktiŋa tam adi mebi hapmuŋ mukufulaune wendi wapumŋiŋ'walaŋ kwanai tilak diniŋ fek tuluwaak. Unduŋ mu tiŋa hogok hatibune aŋelo hekidi kaune kadakawaakneŋ.

¹¹Wapum namanda foloŋ me molomgoŋ be tam molomgoŋ hatidok tuwot mu tilak. ¹²Tam adi me'walaŋ folooŋ dikidi tubumintaguk undigoŋ indi hogohogok tam'walaaniŋ minta ulihakayam. Ingoŋ nemenemek hogohogok adi Bepaŋ'walaaniŋ. ¹³Kabi hide-ku nadikayanenŋ. Tam niŋ

adi mebi hapmuŋ mukufula mu tiŋa Bepaŋ ninadiune tuwot mu tibek. ¹⁴Be me niŋ adi undugoŋ mebi hapmuŋ kweheyeŋiŋ hatibune kaŋ nadiune tuwot mu tibek. Wondiniŋ mebi uyadi kwetfoloŋ metamdi maanŋ agaŋ nadiiŋ. ¹⁵Eŋ tam adigili mebi hapmuŋ kweheyeŋiŋ hatibune kaune utumbalak. Mebi hapmuŋ kweheyeŋiŋ adi Bepaŋdi mebi mukufuladok tubumintamiŋguk. ¹⁶Nebek niŋ adi mede i kelekufale kaŋ indiiŋ nadiwaak: Bepaŋ'walaŋ kayoŋbop be noli indi wanaŋ taliknik noli nimaanŋ nemoŋ. Agaŋ i hogok hatnimilak.

Metam fofonŋit nadiyemdok

¹⁷Nemek niŋ indiiŋ tiŋ wendok adi nadihambe tuwot mu tilak doktiŋa mede hanindidimewit. Woŋ adi indiiŋdok yolat. Hidi Bepaŋ ninadiŋa niutumba titiiŋdok bopneŋila nemek tiŋ wendi welenadifo mu tubumintalak. Adi toboniŋ welehik tubukadakalak, ukuyendok yolat oŋ. ¹⁸Mede Momooŋ nadidok bopneŋila kikakwihita tiŋa daneeŋ bop molomolom hatiŋ. Unduŋ nanimbune nadiwene fukuniŋ biyagoŋ iŋgoŋ tilak.

¹⁹Ala wendok indiiŋ yolat. Kikakwihita be danedane mintalak woŋ adi metam Bepaŋ'walaŋkade ulodikilitiŋdi mintadakaledok-kube tiŋ. ²⁰Unduŋ doktiŋa Wapum'walaŋ Dumuŋ nanaŋdok bopneŋiŋ woŋ adi folooŋ mu tilak. ²¹Nai uŋaniŋ hidi hide'walaŋ nanaŋe ime beŋa buŋa daneeŋ siloŋ mu tiŋa hide hogok gehiŋgehiŋ naiŋ. Unduŋ tiŋa nolidi natoki tulune nolidi map tiŋ. Eŋ noli ime fafaŋeniŋ nehi hogok gibitaŋ naanŋ tububuye tiŋ. ²²Ai! Hidi hide'walaŋ yot yolohi be tiŋa unduŋ tiŋ! Hidi nanaŋe imehik nane nadiŋa yohineŋ gu-ku nanenŋ oŋ! Hidi maŋgoŋde Bepaŋ'walaŋ kayoŋbop be metam fofonŋit fiyewakahi nadihaŋindayemiŋa unduŋ tiŋ? Dediŋ hinek hanimbit! Be haniutumbawit? Unduŋ tiŋ wendoktiŋa nadihambe moŋ hinek tilak-ku be.

Poldi Wapum'walaŋ Dumuŋ nanaŋdok yodidime tuguk (Matiyu 26:26-29; Mak 14:22-25; Luk 22:14-20)

²³Ale i nadiut. Nu Wapum'walaaniŋ nemek indiiŋ nadiŋa moŋgokut u agaŋ haniŋgut: Judadi Wapum Jesu bolik timiŋguk, timiŋ uŋaniŋ Jesudi belet tiŋa ²⁴youtumbaanŋ wobuŋa indiiŋ yoguk: "I na'walaŋ foloone, hiditok gigit tibek yoŋa hamulat. Nu nadisunamuŋa unduŋ taneenŋ." ²⁵Nanaŋe nadapmaanŋ koti koom tuguk undugoŋ wain tout tiŋa indiiŋ yeniŋa yemguk, "Wain ime yoŋ adi na'niŋ naŋgatne u yofolok kobuli tilak. Ale nayaneenŋ tuwot nu nadisunamuŋa nayaneenŋ." ²⁶Hidi Belet be Wain ime u nayaneenŋ tuwot, Wapum'walaŋ kumuŋŋiŋ diniŋ Mede Momooŋ u yohauta hatilune udaneenŋ baak.

²⁷Ale indiiŋ nadineŋ. Nebek niŋdi Wapum'walaŋ belet be wain u nawene nadibedi mu tiŋa nadihaŋindaŋ nawaak, adi Wapum'walaŋ

foloŋ be nangatŋiŋ u kaka nafit tibaak, doktiŋa yomnit tibaak. ²⁸Ale metam nediyeŋ Wapum'walaŋ Belet be Wain nane nadiŋa welehiŋ diniŋ mebi koom kanadiŋa yomhik yofiyali nayaneeŋ. ²⁹Be nediyeŋ Wapum'walaŋ foloŋ u mu kakiyondaŋ kaka nalak adi yadi ne'niŋ yom doktiŋa malabumuŋ hekilak. ³⁰Mebi unduŋ dogoŋ tiŋa hidi'walaŋhi feedi yagiyagit tiŋila gweheyeŋgoŋ tihatiŋ. Eŋ noli agaŋ kumuŋiŋ. ³¹Indi inde mebinik kanadi tiŋa yomnik yofiyakaneem kaŋ kibikoŋ mulapmuŋ mu nimiluwaak. ³²Iŋgoŋ Wapumdi titiŋnik kanadiune tuwot mu tilak doktiŋa malabumuŋ nimilak. Adi unduŋ tiŋa nihitubu-didimeune kwetfoloŋ metam noli kudupdok gigit tineeŋ dut mu liweneem yoŋa unduŋ tinimilak.

³³Ale notneye, hidi Dumuŋ nane buŋa bopneeŋ nohiyedok woomyemaneeŋ. ³⁴Tiŋa nediyeŋ map nadikaŋ ne yolineŋ uŋgoŋ nagidibaŋ buluwaak. Unduŋ tiŋa bu bopneune yomnit mokit tuluwaak. Eŋ mede noli adi na uŋgoŋ wooŋ hanindakalewaat.

Munabulidi kwanai tilak diniŋ mede

12 ¹Notneye, Munabuli'walaaniŋ siloŋ momooŋ wendiniŋ mebi hanindakalewene nadineŋ. ²Indiŋ, hidi koomkwaha Bepaŋ mu nadisukilitimiŋa hogok hatiŋila nadifileŋ bepaŋ yalayaŋa kaulehi, medehinit mokit adi'walaŋkade wooŋ ulodiyagiŋ. ³Ale wendiniŋ fukuniŋbo yobe nadineŋ: Nebek niŋ adi Bepaŋ'walaŋ Munabulidi welen tubulodaune deti "Jesu, nu haki tigamulat" yobek? Be nebek niŋ adi Uŋgoŋiŋ Munabulidi welen mu tubulodaune deti "Jesu adi Wapum" yobek?

⁴Niŋ indiŋ: Munabuli'walaaniŋ siloŋ momooŋ u mebimebi hatak. Iŋgoŋ Munabuli adi kubugoŋ. ⁵Mede Momooŋ diniŋ tubuloda kwanai undugoŋ mebimebi hatak, iŋgoŋ kwanai molom adi Wapum kubugoŋ. ⁶Mede Momooŋ diniŋ saŋiniŋ mebimebi hatak iŋgoŋ Saŋiniŋ Molom adi Bepaŋ kubugoŋ. Adigoŋ hogok tubumintanimdapmalak.

⁷Munabuli adi kwanaiŋiŋ miŋgilaŋgoŋ tiŋa metam hogohogok yehitubu-lodadok nadiŋa metam molomolom saŋiniŋiŋiŋ nimilak. ⁸Ale i nadiŋa yabudakalenim. Me niŋ adi Mede Momooŋ nadisu-fuliŋgoŋnit yodok Munabulidi tubulodalak. Me niŋ adi Munabuli wendigoŋ tubulodaune nadinadi kedem Bepaŋdi nimbu nadiŋa yolak. ⁹Me niŋ adi Munabuli wendigoŋ tubulodaune nadisukiliti wapumnit hatiŋa Bepaŋ'walaŋ kudi wapum niŋ titiŋdok ninadiŋa tubune foloŋnit mintalak. Eŋ me niŋ adi Munabuli wendigoŋ tubulodaune metam yagit folofigitahinit yehitubu-kedebalak. ¹⁰Tiŋa nolidi Bepaŋ'walaŋ saŋiniŋ diniŋ kudi titiŋdok saŋiniŋ moŋgotak. Eŋ niŋ adi kigili mede yodok nadisuŋiŋ dilitomilak, eŋ niŋ adi munabuli mebimebi yabudakaledok nadisuŋiŋ tubutomulak, eŋ me niŋ adi mede gitipmuŋ mu nadilak

ginej Mede Momooj yodok maņij tubulodalak, eņ me niņ adi mede gitipmuņ ginej Mede Momooj nadiņa metam nehi'walaņ medehik ginej tubutakaledok tubulodalak. ¹¹Munabuli kubugoņ wendi nemenemek tubudapmalak, tiņa ne nadilak indigoņ tuwolit metam nemenemek molomolom danenimlak.

Munabulidi kwanai molomolom danenimilak

¹²Me indi'walaņ foloonik adi kubugoņ, iņgoņ foloonik dikidiki adi fe. Ala foloonik dikidiki weņ buņa tomboyoulune foloonik kubugoņ mintalak. Kaņ Kilisto'walaņkade maņ undugoņ wendok tuwolit hatak. ¹³Indi metam fee iņgoņ Munabuli kubugoņdi Imeyout tinimuņa nihikiulune bop kubugoņ tugumun. Judahi metam be Gilikhi metam be tipilapilaye-me tuwaņit mokit be me loloņnit, indi wanaķaņ hogohogok Munabuli kubugoņ uņakoņ nadidahi tiņa saņiniņ kahilegumun.

¹⁴Kaņ foloonik diniņ dikidiki maņ kubugoņ moņ, adi fe. ¹⁵Ale i nadiut. Kayonikdi indiņ deti yobek, "Nu adi kohohik moņ doktiņa foloohik diki mu tilat." Unduņ yoņa foloonik diki noli biyabuņa ne hogok kedembe hatibek? ¹⁶Kaņ magitnik adi dedin tiņa indiņ yobek, "Nu dauhik moņ ale foloohik diniņ diki mu tilat." Unduņ yoņa nehogok dedin tiņa hatibek? ¹⁷Foloonik foloņ daunik hogohogok ikiliune foloonikdi magitnik lohiwek. Be magitnik hogohogok ikiliune timenik lohiwek. ¹⁸Bepaņ adi nadidakale hinek tiņa foloonik diniņ dikidiki hogohogok u ne deņgoņ ilaņa be hali foloonik tubulodadok nadisuguk indigoņ tuwot boņa kwanai molomolom yemguk. ¹⁹Foloonik dikidikidok kwanai tali kubugoņ yembe tuguk adi foloonik nadifo mu tuluwek. ²⁰Foloonik dikidiki feedi kiulune foloonik daņiniņ kubugoņ tilak. ²¹Unduņ doktiņa daunikdi dedin tiņa kohonik indiņ nimbek, "Nu du mokit na hogok kedem hatiluwaat." Kaņ mebinikdi kayoniyat u indiņ deti yenimbek, "Nu hidinit mokit kedem hatibaat."

²²Biyagoņ kuyoņ, foloonik dikidiki gweheyehi yoņa nadiyam adi mokit hatine tuwot mu tibek. ²³Tiņa foloonik dikidiki noli metamdi yabuhaņinda tineeneņ yoņa tinahukut momooņ tiyemam. Eņ foloonik dikidiki mekahinit adi mohinek yehikufulane kabup hebihakiņ. ²⁴Eņ foloonik dikidiki momohi hinek adi miņgoņ biyabam. Ale indiņ nadinim, Bepaņ adi foloonik tubumintagukneņ foloonik dikidiki gweheyehi noli adi kwanai wapum loloņnit hinek yemguk. ²⁵Woņ adi indiņ doktiņa tuguk. Foloonik dikidiki nehi tosiwe mu tiņa kitubuloda momooņ taneen yoņa unduņ tuguk. ²⁶Unduņ doktiņa foloonik diki niņdi folofigita nadiune wanaņ tubulodaaņ nadiiņ. Be niņ eņ nadifo tubune wanaņ tubulodaaņ nadifo tubudapmaiņ.

²⁷Indiņ nadineņ. Nai indidegoņ hidi hogohogok kiulaņa Kilisto'walaņ folooņ tiiņ. Unduņ tiņa adi'walaņ folooņ diniņ kwanai u molomolom

kahileiŋ. ²⁸Wendiniŋ folooŋ Bepaŋ adi kwanai-meniye indi'walaŋ lekiŋgoŋnik foloŋ indiy yapmeguk: Tububihila Aposel, adi'walaaniŋ polofet, adi'walaaniŋ yenindidime hinale, adi'walaaniŋ Bepaŋ'walaŋ saŋiniŋ foloŋ kudi titiŋ metam, adi'walaaniŋ yagit folofigitahinit yehitubu-kedebadok, adi'walaaniŋ metam noli yehitubu-lodadok, adi'walaaniŋ metam talitimeŋ, agaŋ metam mede gitipmuŋ gineŋ mede yoyodok. Metam hogohogok kwanai molomolom unduŋ yemguk.

²⁹Indi aposel hogohogok mu nipmeguk. Be indi wanaŋ polofet be me yenindidime hinale hogohogok mu nipmeguk. Be Bepaŋ'walaŋ kudi titiŋ ³⁰be yagit folofigitahinit yehitubu-lodadok hogok saŋiniŋ mu hatnimilak. Be mede gitipmuŋ mu nadiiŋ yoyodok, be metam noli'walaŋ medehik nadiŋa tubutakaleyemdok hogok mu hatidapmayam. Moŋ hinek. ³¹Unduŋ doktiŋa hidi Munabuli'walaaniŋ siloŋ momooŋ wapumgoŋ moŋgotdok gigne tiyaneerŋ.

**Welesiloŋ tiŋa me noli yabukahile-kahile
wendi kubugoŋ fafaŋeniŋ halaak**

13 Nu wendogoŋ tiŋa talik momooŋ niŋ i hanindidimewe kanerŋ. ¹Nu Munabulidi mebelemne tubulodaune mede gitipmuŋ foloŋ be aŋelo heki'walaŋ mede foloŋ yohauta tibit iŋgoŋ welesiloŋ mu nobu tiŋa metam noli mu yabukahile tibit adi medene baiwagimdi mede woliniŋ hogok toiŋ undiniŋ tibek. ²Tiŋa nu polofet binek hatiŋila Bepaŋ'walaŋ gigitmede yohautawit eŋ mede hebiniŋ nadidapmawit tiŋa gigitmede diniŋ mede dikidiki nadidapmawit eŋ kweboboe niŋ nimbene tabadok nadisukilitine wendok tuwolit hatnambek iŋgoŋ welesiloŋ mu nobu tiŋa metam welenedi hinek mu yabukahilewit adi folooŋnit mokit tibek. ³Tiŋa niŋ indiy, bombone hogohogok u metam fiyewakahidok daneyemdapmawit tiŋa me noli yehitubu-lodadok nadiŋa biyabene nohoneerŋ kudupmebem gineŋ kedem nehikulaheneŋ iŋgoŋ welesiloŋ mu nobu tiŋa metam welenedi hinek mu yabukahilewaat adi nemek hogohogok u tugut wendi kibi toboniŋ nemu nehitubu-lodawaak.

⁴Me niŋdi welesiloŋ tiŋa me noli yabukahile hinek tilak adi fiit nadikwambundaŋ hatilak. Adi metam nolidok nadiŋa yehitubu-lodalak. Tiŋa nemek niŋ netok titiŋdok nadigigineerŋ kelekeleye mu tilak. Me undiniŋdi na hogok tuwot tibit mu yolak, eŋ netok nadiune lolooŋnit mu tilak. ⁵Adi yadi metam hogohogok wanakaŋ titiŋ momooŋ tiyemilak. Nemek fofohi netok titiŋdok mu yabukahilelak. Nadikwihita pilap mu tilak. Adi yadi noliŋiŋ'walaŋ yom mu youhabiyerŋ boi hatilak. ⁶Adi yadi tobo kadakaniiŋ mintaune bulaniŋgoŋ nadilak, eŋ fukuniŋ titiŋ didimeniŋ mintaune nadifo tilak. ⁷Helemahelemaŋ nadisukilitiŋiŋ fafaŋeniŋ hatak. Eŋ helemahelemaŋ nemek kedemdok nadikunakunale kisaŋ tilak. Tiŋa undugoŋ helemahelemaŋ nemenemek mintamilak wendi mu tubugweheyeune fafaŋe tiŋa yatak.

⁸Kigili mede yoyo u dapmawaak, tiņa undugonj Munabulidi mebelem tubutakaleune mede gitipmunj yoyo u maanj dapmawaak, be mebi nadinadi u maanj dapmawaak. Injon welesilonj tiņa me noli welenđi hinek yabukahilekahile adi dapmanj mu tibaak. ⁹Nu indinj nadiņa mede u yolat. Mebi nadinadi faki-kabe hogok nadiņa yoyam. Tiņa undugonj Bepanj'walaņ polofet mede u faki-kabe hogok nadiņa yoyam. ¹⁰Unduj tihatiane folooņ hinek mintaune nemek woliniņ hogok u liwewaak. ¹¹Nu koom mihi-kabe hatiņila wapmihi mede yolugut eņ nadinadine maanj wapmihidok tuwolit hakuk. Tiņa nadisune maanj wapmihidok tuwolit nadisugut. Wendi hatigene wapum tiņa wapmihi nadinadi be titiņ u kwihililiwenegut.

¹²Kaņ nai indidegonj Bepaņdi kougonj nemek tinimbaak u kadakaledok kwanaimiņ tiyam woņadi nemek imenņwanj kuyahi gineņ imedi waliwali tubune wolinik kanene fifile tilak undiniņ hatak. Ala kougonj hatigene folooņ mintadakaleune kikakika tiņa nadidakaleneem. Biyagonj, nu kobuk faki-kabe hogok nadidakalelat, injon kougonj Bepaņdi nabunadilak undugonj nubo kadakalewaat. ¹³Kaņ titiņ fafaņeniņ hakiņi adi nadisukiliti, eņ welenikdi nemek momooņdok nadikunakunale, eņ welesilonj tiņa me noli welenđi hinek yabukahilekahile. Titiņ lufomkulitniņ yendi dapmandapmanņnit mokit hatneeņ ala adi'walaaniņ welesilonj tiņa me noli yabukahilekahiledi wapum hinek tilak.

Munabuli'walaaniņ siloņ momooņ kubugonđi noli yalakapmelak

14 ¹Hidi welesilonņit hatiņa metam noli welesilonj tiyemdok gigine tiyaneeņ. Tiņa undugonj Munabuli diniņ siloņ momohi moņgotdok gigine tiyaneeņ. Eņ Munabulidi hehitubu-lodaune Bepanj'walaaniņ mede nadiņa yohautadok gigine hinek tiyaneeņ.

²Me nediyeņ Munabulidi mebelem tubutakaleune mede gitipmunj yolak adi metam mu yenilak. Adi yadi Bepaņ hogok nilak. Adi yadi Munabulidi mebelem tubutakaleune mede gitipmunj yodok maņiņ tubulodaune mede hebiniņ yolak kaņ metam adi mu nadidakaleiņ. ³Kaņ me nediyeņ Munabulidi tubulodaune Bepanj'walaaniņ mede nadiņa yohautalak adi adi metam yeniyehitubu-didimeeņ yenikilitiņa yenikulemalak.

⁴Kaņ me Munabulidi mebelem tubutakaleune mede gitipmunj yolak adi yadi ne'walaņ welenj niņkilitilak. Eņ Bepanj'walaņ mede nadiņa yohautalak adi yadi Bepanj'walaņ kayoņbop yenikilitilak. ⁵Ale hidi hogohogok Munabulidi mebelemhik tubutakaleune mede gitipmunj gineņ yoneeņ wendok nadiwene utumbawaak. Injon Munabulidi hehitubu-lodaune Bepanj'walaņ mede nadiņa yohautaneeņ adi nadihambene utumba hinek tibaak. Me Munabulidi tubulodaune Bepanj'walaņ mede nadiņa yohautalak adi me niņ Munabulidi mebelem tubutakaleune mede gitipmunj yonja metamdok mu tubutakalelak u kalakapmelak. Unduj doktiņa mede gitipmunj gineņ yokaaņ

tubutakaleŋ metam Bepaŋ'walaŋ kayoŋbop yenimbune nadiŋa wendiniŋ folooŋ tubumintaŋ boihatibune wendigoŋ yehitubu-kilitiune tuwot tibaak. ⁶Notneye, nu hidi'walaŋkade buŋa Munabulidi nehitubu-lodaune mede gitipmuŋ gineŋ mede hanimbene dedinŋ tiŋa hehitubu-kilitiwek? Inŋoŋ nu mede hebiniŋ yobihit, be nadinadi fulinŋ, be kigili mede be yotubudidime mede hanihautawe kedem welehiŋki nadikilitineŋ.

Bepaŋ'walaŋ mede tumutnit mokit yodakaleeŋ yodok

⁷Nemek niŋ foloŋ kamekaŋ hanimbe nadiŋeŋ. Nemek fiili, wagim be baidi medehik didimeneŋoŋ mu tobune nohiyedi detiŋa kap hapmuŋ nadidakaleneŋ? ⁸Be bai didimeneŋoŋ mu fedilune dedinŋ tiŋa nadidakaleeŋ memik biinŋ yoŋa tebe bohomo tiulidokoneŋ? ⁹Ale hidi maŋ undugoŋ Munabulidi mebelemhik tubutakaleune mede gitipmuŋ gineŋ mede tumutnit yobune nolidi dedinŋ tiŋa nadiŋeŋ? Woŋ adi yobune folooŋnit mokit tibaak. ¹⁰Kwetkwet mede mebimebi haliwiinŋ u molohiyedi mebi kedem nadidakaleinŋ. ¹¹Inŋoŋ nu me niŋ medeŋinŋ yolak mu nadilat adi nutok nadinambune kauleŋ tibek. Kaŋ nubo aditok nadiwene kauleŋ inŋoŋ tibek. ¹²Ale hidi'walaŋ mebi maŋ undugoŋ hatak. Munabuli'walaŋ saŋiniŋ hidi'walaŋkade mintadok kedem yoŋin ala Munabuli'walaŋ siloŋ momooŋ u kayoŋbop yeniŋkilitidok gigine taneŋeŋ.

¹³Unduŋ doktiŋa nebek niŋ Munabulidi mebelem tubutakaleune mede gitipmuŋ gineŋ mede yobaak adi yadi mebi nadihinakaŋ metam tubutakaleyemdok Wapum ninadiune tubulodawaak. ¹⁴Be nu Munabulidi mebelemne tubutakaleune mede gitipmuŋ gineŋ ninadi tiŋa adi munabulinedi hogok tibune nadisune adi nadidakaleniŋ mokit halek. ¹⁵Ale wendoktiŋa dedinŋ titiŋdok? Indinŋ titiŋdok. Munabulidi nehitubu-lodaune mede gitipmuŋ gineŋ kedem ninadiwit, eŋ nadisunedi maŋ nadidakaleniŋ ninadiwit. Tiŋa undugoŋ Munabulidi nehitubu-lodaune mede gitipmuŋ gineŋ niutumba kap tobit, eŋ nadisunedi maŋ nadidakaleniŋ kap toŋa Bepaŋ niutumbawit. ¹⁶Be du munabulige hogokdi Wapum niutumbaune noke niŋ adi ninadige mu nadidakaleeŋ "U biyagoŋ" deti gehitubu-lodaŋ yobek? ¹⁷Biyagoŋ, du Wapum binek niutumbaŋaŋ inŋoŋ noke adi mu nadidakaleŋak doktiŋa weleŋ mu lodawetik. ¹⁸Nu adi Munabulidi mebelemne tubutakaleune mede gitipmuŋ gineŋ mede yolatdi hidi'walaŋ kalakapmelak doktiŋa Bepaŋ niutumbalat. ¹⁹Inŋoŋ nu wendok nadiwene folooŋ binek tiliwek woŋ adi metamdi Bepaŋ niutumbadok bopneune mede kweheyeniŋ hinek kedem yolit. Inŋoŋ nu wendok nadiwe folak. Tiŋa metam Mede Momooŋ lufomgoŋ nehi'walaŋ mede foloŋ yodakaleeŋ yenindidimedok adi nadiwe folooŋ hinek tilak.

Nadidakaleniŋ mintawe kaŋ adi me kilitihidok tuwolit tibaak

²⁰Notneye, hidi mede nadidakale titiŋdok nadisuhik wapmihi nadinadi mu hatiyaneeŋ. Kadakaniŋdok adigili nadisuhikdi wapmihi'walaŋ

wondok tuwolit hatiyaneeḡ. Eḡ nadidakaledok adi me aḡaḡ kilitihi eḡ naditomih i aditok tuwolit hatiyaneeḡ. ²¹Yodoko Mede gineḡ mede niḡ indiḡ youkiḡ hatak, “Wapumdi yolak, nu me gitipmuḡ, niḡkadehi yanagilene buḡa nehi’walaḡ mede foloḡ metam i nu’niḡ mede yenimbune u maḡ fiit mu nadinamneeḡ.”

²²Ale wendok fukuniḡbo indiḡ yobit. Munabulidi mebelem tubutakaleune mede gitipmuḡ yoyo uyadi Bepaḡ’walaaniḡ kudi niḡ. Woḡ adi metam nadisukilitihinitdok gigit mu tilak. Woḡ adi metam Bepaḡ mu nadisukilitimiḡ aditok gigit tilak. Eḡ Munabulidi tubulodaune Bepaḡ’walaḡ mede nadiḡa yobihit adi metam Bepaḡ mu nadisukilitimiḡ aditok gigit mu tilak. Woḡ adi metam nadisukilitihinit aditok gigit tilak. ²³Ale i nadiḡeḡ. Kayoḡbop wanaḡaḡ bopneeḡ metam wanaḡ Munabulidi mebelemhik tubutakaleune mede gitipmuḡ gineḡ yolune me niḡ Munabulidi siloḡ tilak u mu nadilakdi bek, be me nadisukilitinit mokit niḡdi looḡ habuḡa indiḡ yobek, “Ya nadinadihik filune tobubuye tiḡ.” ²⁴Be kayoḡbop wanaḡ Munabulidi yehitubu-lodaune Bepaḡ’walaḡ mede nadiḡa i la yohautalune metam nadisukilitihinit mokitdi bek, be me niḡ Munabulidi siloḡ tilak u mu nadilakdi uḡoḡ looḡ habuḡa Bepaḡ’walaḡ gigitmede u nadiwek adi yadi ne’niḡ weleḡ diniḡ mebi wanaḡaḡ hogohogok kanadi tiḡa weleḡ tubutakalewek. ²⁵Unduḡ tiḡa weleḡ maaneḡ nemek kabup nadifula tubune halek u tubuhaḡindaune moḡ kaḡ duwokeneeḡ i la Bepaḡ nintiḡaloḡ yobek, “Bepaḡ adi biyagoḡ hinek hidut hatilak.”

Bepaḡ niutumbanene welehik hamap mu baneḡ

²⁶Notneye, ale dediḡ. Hidi Bepaḡ niutumbane nadiḡa bopneḡ niḡdi toutumba kaḡ nadisuḡa buluwaak, niḡ eḡ metam yenintubudidimedok mede tiulidokoḡ buluwaak, niḡ eḡ Bepaḡdi mede hebiḡiḡ nimbihitak u yohautadok tiulidokoḡ buluwaak, niḡ eḡ Munabulidi mebelem tubutakaleune mede gitipmuḡ yobe buluwaak, niḡ eḡ mede gitipmuḡ u mebi hide’walaḡ mede gineḡ tubutakalewe buluwaak. Nemek u hogohogok woḡ adi Bepaḡ’walaḡ kayoḡbop nadisukilitihik yehitubukilitidok nadiḡa taneḡ. ²⁷Tiḡa Munabulidi mebelemhik tubutakaleune mede gitipmuḡ yone kaḡ metam feedi mu yoyaneeḡ. Lufom bek, be lufomkulitniḡdi hogok yoyaneeḡ. Kubugoḡ kubugoḡ nilidibo yoḡ nilidibo yoḡ tubune nolidi mebi nadiḡa tubutakaleḡ haniyaneeḡ. ²⁸Be me mede tubutakaledok nemu hatihambune kaḡ mede gitipmuḡ mu yoyaneeḡ. Nebek niḡ adi unduḡ tibene nadiḡa ne hogok Bepaḡ’walaḡkade yoluwaak.

²⁹Eḡ Munabulidi polofet tubulodaune Bepaḡ’walaḡ mede nadiḡa yohautadok adi undugoḡ. Me lufom bek, be lufomkulitniḡdi hogok yoyaneeḡ. Kaḡ nolidi i la kametnadi tiḡa kanadiyaneeḡ.

³⁰Be Munabulidi me niŋ'walaŋ welaŋ gineŋ mede tubumintamimbune tomboyoula yobune kaŋ timeŋ yoluwaak adi wabi tuluwaak.

³¹Bepaŋ'walaŋ mede yohauta u kedem taneen ala kubugoŋkubugoŋdi yohautaune gigitmededi metam hogohogok yeniyehitubu-didimeŋ kiulihi taneen. ³²Bepaŋ'walaŋ mede yohautaiŋ adi nohiye'walaŋ mede nadiŋa nilibo yoon, nilibo yoon kedem taneen. ³³Bepaŋ adi nemek tiŋgiyoŋgiyone mu tilak. Bepaŋ adi kulemaŋgoŋ eŋ didimeneŋgoŋ tilak.

Hidi Bepaŋ niutumbadok nemek didimeneŋgoŋ hinek taneen

Noli indiŋ. Kayoŋbop noli gineŋ Mede Momoon yonadidok bopneŋila ³⁴tamwoi adi mede kabup ikiin. Ale hidi maan undugoŋ tiyaneen. Tamwoi adi unduŋ tiŋa fofonit hatidok Judahi'walaŋ Yodoko Mededi yolak. ³⁵Be adi nemek niŋ nadine kaŋ yohineŋ woon yohohiye yeninadiyaneen. Tam niŋ adi kayoŋbop diniŋ bop gineŋ pilali yali mede yobune tuwot mu tibetik.

³⁶Bepaŋ'walaŋ mede hidi'walaŋkade be tububihila mintagak? Be hidi hide hogok nadigin? ³⁷Niŋ indiŋ. Hidi'walaŋniŋ niŋdi netok nu polofet be Munabulidi siloŋ tinamulak unduŋ nadiwaak adi yadi mede youhamulat i Wapum'walaŋniŋ mede unduŋ nadidakalewaak. ³⁸Eŋ nediyeŋ mede i nadiune folooŋnit mokit tibaak aditok adi sigilulum timindok.

³⁹Unduŋ doktiŋa notneye, indiŋ nadiŋeŋ: Hidi Munabulidi hehitubu-lodaune Bepaŋ'walaŋ mede nadiŋa yohautadok gigne tineen. Eŋ Munabulidi mebelemhik tubutakaleune mede gitipmuŋ yoyo wendok kamehep adi mu tiyaneen.

⁴⁰Eŋ mebi hinek adi indiŋ: Hidi Bepaŋ niutumbadok nemek hogohogok taneen u tuwolit tuwolit eŋ didimeneŋgoŋ hinek taneen.

Poldi Jesu biyagoŋ hinek hatilak wendok yeniyehitubu-kilitiguk

15 ¹Notneye, Mede Momoon haniŋgut nadiŋa moŋgo hatiin uŋakoŋ yo tubukaikaan hanimbit. ²Ala hanihehitubu-didimegut wendok tuwolit nobu kamehatiin kaŋ wendigoŋ tuwot hehitubu-lodaan hehitubu-kedebaluwaak. Tiyaugene nadisukilitihikdi folooŋnit mokit nobu tibaakneŋ ala. ³Nu Wapumdi mede nanimbune nadigut uŋakoŋ hidibo haniŋila mede folooŋ niŋ indiŋ haniŋgut: Kilisto adi netok mede youhebet Bepaŋ'walaŋ Youkudip Mede gineŋ hakuk wendok tuwot takaliŋa uyeŋ indi'walaŋ yomnikdok kibikoŋ koloŋdabek foloŋ kumuŋguk. ⁴Tiŋa Bepaŋ'walaŋ Youkudip Mede gineŋ yoŋit undugoŋ hinek wenefulagiŋ kaŋ mebom gineŋ mele nai lufomkulitniŋ hali kotigoŋ kaikaan pilakuk. ⁵Pilali timeŋ Pita mintamiŋguk, uŋaniŋ mihiniye 12 mintayemguk, ⁶uŋaniŋ metam kayoŋbop nadisukilitihinit kunakunathik 500 kalakapmelak unduŋdi bopnelu mintayembune wanakaŋ kadapmagiŋ. Adi'walahi noli hogok hatiin eŋ lufomkabedi agan

kumunġinġ. ⁷Uġaniġ Jems mintamiġguk, eġ uġaniġ aposel hogohogok wanaġ mintayemguk. ⁸Adi mintayemdapmaġ mindaġ hinek talik molomgoġ-kabe foloġ mintanambune kagut. Nu adi maġ hekidi wapmihi mu kitaune yanagikiinġ talik unduġ foloġ Aposelġinġ nanagikuk. ⁹Nu adi Aposel foforġnit hinek. Maġgoġde, nu adi Bepaġ'walaġ kayoġbop udihi yehikeleenġ kisaġ yehitubu-kadakagutneġ ale nutok Aposel nanimbune tuwot mu tilak. ¹⁰Nu Aposel mintagut adi Bepaġdi siloġ tobogoġ tinamguk doktiġa mintagut. Kaġ siloġ tobogoġ u nu'walaġkade folooġnit mokit mu tuguk. Nu kwanai tugutdi me noli tigiġ yalakapmelak. Inġoġ nu na saġiniġne deġgoġ moġgola tibe tugut. Bepaġ'walaaniġ siloġ tobogoġ nukut hakukdi tuguk. ¹¹Ale Aposel noli be nu, indi Mede Momooġ uġakoġ yohautayam kaġ hidi uġakoġ nadisukilitiġa boi hatiġinġ.

Kumuġ gineniġ pilapilat diniġ mede

¹²Niġ indiġ. Kilisto adi kumuġ gineniġ kaikaanġ pilakuk Mede Momooġ unduġ hanine nadikabeleenġ maġgonde nolidi kumuġ gineniġ pilapilat mu hatak yoiġ? ¹³Kumuġ gineniġ pilapilat mu hatak yokaanġ Kilisto maanġ kumuġ gineniġ mu pilakuk yodok. ¹⁴Kilisto mu pilale tuguk binek adi Mede Momooġ yoyam u folooġnit mokit tiluwek, eġ nadisukilitinikdi undugoġ folooġnit mokit tiluwek. ¹⁵Tiġa u hogok moġ. Indi indiġ yogumun, Bepaġ adi Kilisto kumuġ gineniġ tubupilakuk. Ale kumuġ gineniġ pilapilat mu hatiwek binek adi Bepaġdi Kilisto mu tubupilale tuguk. Be wendiniġ mede yogumun indi adi Bepaġ'walaġ mede u yalaġ yogumun tiluwek. ¹⁶Metam kumuġ gineniġ mu pilatneenġ yokaanġ Bepaġ adi Kilisto maanġ kumuġ gineniġ mu tubupilakuk yodok. ¹⁷Kilisto kumuġ gineniġ mu pilale tuguk binek nadisukilitihik folooġnit mokit tiluwek eġ yomhik uġgoġ hahamuluwek. ¹⁸Tiġa indiġ maanġ, Kilisto nadisukilitimiġa kumuġinġ heki adi yadi liwedapmaġ-ku tigiġ oġ. ¹⁹Unduġ doktiġa kumuġ gineniġ pilapilat mu hatak u biyagoġ nobu tibek adi nadisukilitinikdi folooġnit mokit tubune metam nolidi nibune fiyewakaġ hinek tiġa bulaniġgoġ wapum tineem.

Nai wapum foloġ nemenemek mintawaak

²⁰Ala unduġ hogok moġ. Kilisto adi biyagoġ hinek kumuġ gineniġ kaikaanġ metam kumuhi aditok talitimeġ tiyemiġa pilakuk hatilak. ²¹Eġ mebi niġ indiġ hatak. Me kubugoġdi kumuġ tububihikuk undugoġ me kubugoġdi kumuġ gineniġ pilapilat tububihikuk. ²²Adam'walaġ hatihati kominġ hatiyam doktiġa kumuyam. Undugoġ Kilisto'walaġ hatihati kobuliniġ hatiyam doktiġa Bepaġdi nihitubu-kaikaune pilatneem. ²³Inġoġ hebetġinġ dibek hatak indigoġ tituwali pilatdok. Timeġ hinek Kilisto ne pilakuk, uġaniġ busuwabusuwa nai foloġ metam Kilisto netok gigit hinek hatiġinġdi pilatneenġ. ²⁴Uġaniġku nai dapmawaak. Kaġ

Kilistodi me lolonjhinit eŋ mapme saŋiniŋhinit eŋ yabap moihi gigne kisaŋ tiŋ wanakaŋ hogohogok udihi yehitiŋafooŋ yehiyalifilida-dapmawaak. Unduŋ tiŋa Wapum adi Bepaŋ'walaŋ Hatihati Uŋgoniŋ kwanai tilak hogohogok u Beu Bepaŋ kohoŋ foloŋ kamelune uŋaningoŋ nai dapmawaak. ²⁵Nai indidegoŋ Wapum adi kwanaiŋiŋ kougoŋ hati tilak, ala titaueŋ Bepaŋdi memikŋiye yehitifodapmaŋ kwanaiŋiŋ tubudapmawaak. ²⁶Memik wapum hinek mindaŋ dapmandapmaŋ foloŋ utubuliwewaak adi wou “kumuŋ”.

²⁷Bepaŋ adi nemenemek hogohogok u adi'walaŋ hebeŋ foloŋ boiŋa yabudokodok niŋguk. Ale “nemenemek hogohogok” yoguk adi nadine Bepaŋdok maŋ yonit unduŋ mu tibek. Adi kuyeŋgoŋ Kilisto'walaŋ hebeŋ foloŋ nipmegukdi detiŋa ne Kilisto hebeŋ foloŋ fowaak. U tuwot moŋ. ²⁸Tiŋa Bepaŋ ne metam be nemenemek hogohogok Mihiniŋ'walaŋ hebeŋ foloŋ boidapmalune Mihiniŋ ne Beu hebeŋ foloŋ fooŋ yalaak. Kaŋ Bepaŋ ne nihikwalaneune adi'walaŋ titiŋiŋiŋdi hatihati u kilidapmawaak.

Kumuŋ gineniŋ pilapilat mu hatak yogiŋ

²⁹Hidi'walahi nolidi me kumuŋhinitdok kwehikoŋ tiŋa Imeyout tiŋ. Kei! Kumuŋ gineniŋ pilapilat mu hatak kaŋ maŋgande unduŋ tiŋ? ³⁰Tiŋa indi maŋ, maŋgonde mik-kwadi foloŋ helemahelamaŋ hatigumundi hatiyam? ³¹Notneye, Kilisto Jesu Wapumnikdi nu'walaŋkade hehibopneune nadisukilitigiŋ doktiŋa nadifo tilat. Hidi'walaŋ namandahik foloŋ biyagoŋ yolat, nu adi kumuŋdi melenai indigoŋ tuwot nehitudu-dulalune hatilat. ³²Tiŋa nu Efeso yokwetneŋ kale moihi mikhinitdut kiwobu tugut u kwetfoloŋ me'walaŋ mede foloŋ nobu ulodiŋa tibit kaŋ wendiniŋ folooŋ maŋgoŋ mintanambaak? Kumuŋ gineniŋ pilapilat mu hatak kaŋ indiŋ yobe tuwot tibek, “Tiyauge haloŋ nebek neeŋ kumunimneŋ ale kamiŋgoŋ kale nanaje bopneŋ hinaŋ tine.” ³³Nebek niŋdi haniŋkamandaŋ hehitubu-kadakaneeneŋ ala, mede niŋ indiŋ hatak u nadineŋ. Me niŋ adi me kadakahi dut wooŋ galiŋa hatibaak adi yadi titiŋiŋiŋ kadaka tibaak. ³⁴Ale hidi nadidakaleeŋ hatiŋila kadakanŋ mu taneŋ. Hidi'walahi nolidi Bepaŋ kaulemiŋ tiŋ doktiŋa i nadiŋa meka tineŋdok yolat.

Kaikaŋ pilapilat diniŋ folonamandap

³⁵Me nolidi indiŋ binek yonadineŋ; kumuhi adi dedeŋ tiŋa kaikaŋ pilatneŋ be pilali folonamandap dedihigoŋ diweneŋ? ³⁶Mede woŋ adi kaulaŋ. Hidi nemek yetiŋ adi mundiniŋ hogok mu kadoŋa loiŋ. Adi yadi kiliki be miŋ tipmeŋdi kumuŋbitakaune mundiniŋ kadoŋa labiŋ. ³⁷Ale nemek yetiŋ u nadineŋ. Hidi mundiniŋ mu yetiŋ. Haŋgom, kahak, be nemek noli u kiliki yetiŋ, ala mundiniŋ be boki eŋ kwedei hapmuŋ adi mindaŋ kadoŋa labu mintaiŋ. ³⁸U Bepaŋdi hebet kameyemguk tuwolit kiliki mebimebi indigoŋ hapmuŋ molomolom kadolabuŋa mintadakaleiŋ.

³⁹Ale folonamandap maan molomolom haliulak: Metam indi'walaŋ namandap molomgoŋ. Kale heki'walaŋ molomgoŋ. Bagi heki'walaŋ molomgoŋ. Kale imeneŋhi'walaŋ molomgoŋ. Unduŋ haliulak. ⁴⁰Eŋ niŋ indiŋ. Nemeŋ folooŋ kunum gineŋ boiguk ilawiŋ, undugoŋ kwetfoloŋ maan boiguk ilawiŋ. Ala kunum gineŋ ikiŋ adi'walaŋ folonamandap niŋ. Eŋ kwetfoloŋ ila wiŋ adi'walaŋ namandap niŋ. ⁴¹Ale i nadinim, mele'walaŋ hauta molomgoŋ, eŋ muyakiŋ'walaŋ u molomgoŋ, hinantilameŋ heki'walaŋ hauta u molomgoŋ. Ala hinantilameŋ heki'walaŋ namandap adi undugoŋ, kubugoŋ moŋ. Adi yadi hautahik molomolom hayemilak.

⁴²Wendok tuwot kumuŋ gineniŋ kaikaan pilapilatdi maan undugoŋ hatak. Wenefula tiŋitdi liwewaak, kaŋ pilalaakdi kotigoŋ mu liwewaak. ⁴³Kumuhaŋindaan wenefulaŋit, iŋgoŋ namandap momooŋ nadifonit pilalaak. Kumunŋweheyeŋ wenefulaŋitdi hakene saŋiniŋnit pilalaak. ⁴⁴Eŋ folooŋ gitnem kwet namandapnit wenefulaŋit, ala kaugoŋ adi kunum namandapnit pilalaak. Kwet diniŋ folonamandap hatak indigoŋ kunum diniŋ folonamandap maan hatak.

Adam komi eŋ Adam kobuli

⁴⁵Mede niŋ indiŋ youkiŋ hatak. Adam koom mintaguk adi Bepaŋdi munabut fedidahimimbune hatihatiniŋ tuguk. Kaŋ Adam mindaŋniŋ adi yadi Munabuli. Unduŋ doktiŋa hatihati diniŋ molom tiŋa metam hatihati yemulak. ⁴⁶Munabuli molomdi timeŋ mu mintaguk. Moŋ. Kwetfoloŋmedi timeŋ mintaune munabuli molomdi mindaŋ mintaguk. ⁴⁷Me timeniŋ adi Bepaŋdi kwet moŋgola tutumbaguk doktiŋa adi kwetfoloŋniŋ. Eŋ me mindaŋniŋ adi adi kunum gineniŋ. ⁴⁸Kwetfoloŋ me hatiguk indigoŋ kwetfoloŋ metamŋiye hatiyam. Eŋ me niŋ kunumneniŋ hatilak undugoŋ indi kunumdok gigit hatiyaneem. ⁴⁹Ale Adam'walaŋ namandap mintagumun indigoŋ Kilisto'walaŋ namandap moŋgotneem.

Hatihatidi kumuŋ kumuyewaak

⁵⁰Notneye, mede niŋ indiŋ yobe nadineŋ. Foloonik kwetfoloŋ boihatiyam yendi Bepaŋ'walaŋ Hatihati Uŋgoniŋ mu kahilewaak. Be nemeŋ dokobitaka tilakdi nemeŋ fafaŋeniŋ mu kahilewaak. ⁵¹Mede niŋ kabup hatak i hanimbe nadineŋ. U indiŋ, indi wanaŋ kumuŋdapman mu tineem, iŋgoŋ indi hogohogok adi namandap uŋgoniŋ yageledapmaneem. ⁵²Bai mindaŋ hinek weŋ kolune pilap gehiŋgehiŋ unduŋ-ku tineem oŋ. Bai tobune kumuŋ tigiŋdi kaikaan pilali folonamandap fafaŋeniŋ liwedapmanit mokit moŋgola hatineŋ. Eŋ hogok hatineemdi maan namandap uŋgoniŋ yageleneem. ⁵³Foloonik dokobitaka titiŋdok yendi hatihati momooŋ hinek liwedapmanit mokit yageleŋ kahilewaak. Eŋ foloonik kumuŋdok gigit tugukdi hatihati fafaŋeniŋ kahilewaak. Woŋ adi dahidahi nabugoŋ dahiune fowaak.

⁵⁴Tiņa dokobitaka titiᅇdokdi namandap momooᅇ yageleeᅇ hatihati momooᅇ hinek kahilewaak, be kumuᅇdok gigit tugukdi hatihati fafaᅇneᅇ kahilewaak, nai uᅇaniᅇ mede indiᅇ youkiᅇ u fafaᅇweaak, “Hatihatidi fafaᅇᅇ kumuᅇ kumuyeguk.”

⁵⁵“Kumuᅇ, du saᅇniᅇᅇ de?

Kumuᅇ, du goliᅇgoliᅇᅇ de?”

⁵⁶Kadakaᅇiᅇdi kumuᅇ diniᅇ goliᅇgoliᅇᅇ tilak. Eᅇ Yodoko Mede doktiᅇa kadakaᅇiᅇdi saᅇniᅇᅇnit tilak. ⁵⁷Iᅇgoᅇ Bepaᅇ adi Wapumnik Jesu Kilistodi kwanai wapum tuguk doktiᅇa nihitubu-lodaune nemenemek hogohogok yehitifoᅇᅇ fafaᅇeyam. Unduᅇ doktiᅇa indi Bepaᅇ niutumbayam. ⁵⁸Ale notneye momohi, hidi fafaᅇe tiᅇa hatiyaneᅇᅇ, tiᅇa Wapum kwanaiᅇiᅇdok helemahelamaᅇ gigiᅇe tiᅇa taneᅇᅇ. Wapum’walaᅇ kwanai tinene folooᅇᅇnit hinek tilak. Unduᅇ yoᅇa taneᅇᅇ.

Muneᅇᅇ ugamali metam fiyewakahi yehiulihidok

16 ¹Bepaᅇ’walaᅇ metam yehiulihidok muneᅇᅇ boine kaᅇ Galesiyahi kayoᅇᅇbop yenindakalegut unduᅇ taneᅇᅇ. ²U indiᅇ taneᅇᅇdok hanilat. Hidi muneᅇᅇ kwanai tubune muneᅇᅇ mintahamuluwaak uᅇaniᅇ Sonda indigoᅇᅇ tuwot molomolom ugamali bopneyaneᅇᅇ. Ala uᅇoᅇᅇ busuwawene muneᅇᅇ kotigoᅇᅇ mu hati-ugamatneᅇᅇ. ³Nu busuwawaatneᅇᅇ adi yodakale mede pepa foloᅇ youla me nedigoᅇᅇ nadiyembune utumbaune muneᅇᅇ beᅇa uuᅇdok yenindapmagiᅇᅇ adi yemiᅇa yeniᅇkutne hidi siloᅇdok muneᅇᅇ boigiᅇᅇ u beᅇa Jelusalemde uneᅇᅇ. ⁴Be hidi nadiune tuwot tubune kaᅇ nakat noᅇgoᅇᅇ uneem.

Poldi kwet deᅇandiᅇᅇ kwanai ti-yawaakdok yeniᅇᅇguk

⁵Nai indidegoᅇᅇ adi Masedoniya kwetneᅇᅇ uyeᅇᅇ dapmaᅇᅇ hidi’walaᅇkade waat. Tiᅇa Masedoniya kwetneᅇᅇ uᅇoᅇᅇ yagigi mu hatibaat. Hogok dapmatau tibaat. ⁶Eᅇ hidut adigili yagigigoᅇᅇ binek hatiyane gwi mulum nai tibaak. Ala mindaᅇkade hidi kedem talikdok nehiulihine talikne uᅇoᅇᅇ be uᅇoᅇᅇ yawaat. ⁷Kamiᅇᅇ yoᅇᅇ adi me nalum wele hogok dapmatau mu titiᅇdok nadilat. Bepaᅇᅇdi nadinambune tuwot tubune hidut nai muniniᅇᅇ hatiᅇa hapmeᅇᅇ baat. ⁸⁻⁹Iᅇᅇᅇᅇ adi Wapumdi kwanai titiᅇdok talik momooᅇᅇ tubutomnamulak, iᅇᅇᅇᅇ oᅇᅇ, baᅇamneᅇᅇ uᅇᅇᅇᅇ memikneye fee hatiᅇᅇᅇ doktiᅇa Efeso iᅇᅇᅇᅇ kabe-muniniᅇᅇ hatiluwene Uᅇᅇᅇᅇᅇᅇ Munabuli foguk diniᅇᅇ nai (Pentikos) tibaak.

¹⁰Niᅇᅇᅇᅇ indiᅇᅇᅇᅇ hanindidimewene nadineᅇᅇ. Timoti adi Wapum’walaᅇ kwanai na tilat wendok tuwolit hinek tilak. Unduᅇ doktiᅇa hidi’walaᅇkade busuwaᅇᅇᅇ hatibune menot momooᅇᅇ timineᅇᅇ. Unduᅇ timimbune adi muntamuntayeᅇᅇᅇᅇ mu hatibaak. ¹¹Eᅇᅇᅇᅇ nebek niᅇᅇᅇᅇᅇᅇᅇᅇ mu timimbaak. Kulemaᅇᅇᅇᅇᅇ hinek kameune udaneᅇᅇᅇ nu’walaᅇkade baak. Adi notniye nadisukilitihiniᅇᅇ noli dut wanaᅇᅇᅇᅇᅇᅇᅇᅇ. Nu adi aditegoᅇᅇᅇᅇᅇ woomilat.

¹²Kaŋ notnik Apolo adi metam kayoŋbop noli dut wanakaŋ wooŋ habudok niŋkulene mu lodaŋ ulak. Ale kougoŋ nai niŋ mintaune waak.

Nadisukiliti gineŋ fafaŋeŋ kikadoko taneŋ

¹³Niŋ indiŋ hanilat. Hidi kikadoko tiŋa kiulihi tiŋila nadisukiliti gineŋ fafaŋeneŋ. Unduŋ tiŋa gweheye mu tiŋa fafaŋe tiŋa yatneŋ. ¹⁴Eŋ nemenemek hogohogok u welehiŋ siloniŋgoŋ taneŋ.

¹⁵Tiŋa notneye, niŋ indiŋ hanimbene nadiŋeŋ. Akaia kwetneŋ Stefana bopŋiye adi timeŋ tububihila wele tubutakale tiŋa kayoŋbop gineŋ tomboyukiŋ, tiŋa nai indidegoŋ Mede Momooŋ ulihiŋa kwanaineiŋ. U hidi agaŋ nadiiŋ. ¹⁶Unduŋ doktiŋa hidi Stefana meŋiye be metam noli yehitomboyoula Mede Momooŋ kwanai noŋgoŋ tiŋ, me undihi'walaŋ mede nadiŋa takaliyaneŋ. ¹⁷Nu mewoi, Stefana eŋ Fotunata tiŋa Akaiŋkus hekidi buŋa hidi wanaŋ hehikiulaŋa hiditok kayoŋkoŋ mede kahat tinambune welemomooŋ nadihamulat. ¹⁸Adi unduŋ tubune hidi be indi welenik kulemaguk. Ale hidi me undihidok welemomooŋ nadiyemiŋa medehik nadiyaneŋ.

Yodapmaŋ mede

¹⁹Wapum diniŋ kayoŋbop Esiya kwet dikidikineŋ hatiŋdi hiditok welemomooŋ nadihamiiŋ. Akwila eŋ Piliska tiŋa metam adi'walaŋ yohineŋ bopneŋ Bepaŋ niutumbaiŋ, adi maŋ hiditok welemomooŋ nadihamiiŋ. ²⁰Iŋahi metam kayoŋbop hogohogok hiditok welemomooŋ nadihamiiŋ. Ale kayoŋbop hidi hidebo kohokukut tineŋ.

²¹Nu Pol, nagoŋ welemomooŋ hinek nadihamuŋa haniutumbaŋ na kohonedi youhamulat. ²²Nediŋyendi Wapum welesiloŋ mu timimbaak adi yadi hamdok gigit tibaak.

O Wapumnik, du beŋ.

²³Wapumnik Jesu Kilisto'walaŋ siloŋ tobogoŋ u hidut hatuwaak.

²⁴Kilisto Jesu wou foloŋ na welenedi hidi wanakaŋ habukahile hinek tilat.

Unduŋ hogok.